



懷寧縣志卷十九

儒林

士生當世不幸不獲以勳業表見於時而窮廬落寞徒以儒稱亦可悲已雖然達則行義窮則求志獨善之身實斯文所繫屬天心之復所見端言坊行表守道以待後學儒豈苟焉而已乎當夫子之世儒有君子小人之分儒之分際其嚴哉夫子之後儒分爲八亦皆有聖人之一體或不至流於小人之歸焉焚坑黃老剝散之餘不可無訓詁之儒異端虛無寂滅之傳染又雜而爲性理之儒訓詁者因文字以求道而僞者乃以道存乎文字之間性理者吾道一貫之大原而僞者乃以索之下學力行

之始臺釐之差必有千里之謬而況其所差之已甚哉於是更相是非迄無定論儒之途若是其紛紛也然講學於三代而下洵不可惑於紛歧衡儒於三代而下又未可律以一格學之出於多端自漢宋諸儒而已然矣希天希聖固屬狂者之大言而君子善人亦往往絡繹於其間其遺風餘韻並足彪炳史冊何獨於懷而苛求之段志明代理學列傳如程程之踐履篤實雷鳴春之治禮經游於詩之好理學家言劉若實之講論語篇首學字謂有子註脚甚明非學天學聖但學自己學爲人而已此等皆直揭訓詁之要領而廓清理家之迂疏其他卽偶有門戶之習正不必子面如吾面矣前志廢理學傳而易以儒林其見

不可謂不卓乃其爲說以爲必著成一書羽翼經傳者列之儒林以爲詞人弁冕而於段志諸人多所移置則未免葉公之好龍矣今所採錄學行深淺純駁不拘一致要其精神必有所注於語言文字之外而非徒以其著述表見也嗚呼儒術之陵夷於今爲極天運循環無往不復晦明之機斡旋之任豈不賴有其人哉世有篤志之士可以知其消息之所在矣

宋朱翌字新仲舒州人自號澗山居士

洪邁猗覺寮雜記序稱桐鄉朱先生故桐城志

據以爲桐人其實懷寧時爲舒州治所澗山隸縣境也

父載上嘗從蘇軾黃庭堅遊翌承

其家學而才力又頗富健故文有元祐遺風政和中登進士第南渡後官中書舍人掌書命顯於時秦檜惡其不附己諷言者

論其黨趙鼎謫居韶州倡明道學粵東化之在韶十九年名山勝景遊覽殆徧著有猗覺寮雜記又有湘江潛川等集四十五

卷詩集三卷

俱詳藝文

吳械字才老舒州同安人

見韻補徐歲序及王明清揮塵三錄

宣和六年第進士

召試館職不就紹興中為太常丞以為孟仁仲草表忤秦檜出為泉州通判以終所著有書裨傳毛詩補音論語指掌考異續

解楚辭釋音韻補凡五種

存佚俱見藝文

方闡一舒州懷寧人淳熙中為郡博士時溫陵曾種守舒州命聞一輯大易粹言十卷宋志誤以為種作非也四庫全書提要

辨之

詳藝文

王曰休懷寧人誨誘後進最為諄切自小兒叉手著衣祇揖入學寫字讀書治經閱史及作文字皆井井有條學者依賴焉稱為龍舒居士著有龍舒易解一卷春秋孫復解辨失一卷公羊辨失一卷左氏辨失一卷穀梁辨失一卷春秋名義一卷

俱見宋史

藝文志

又養賢錄模楷書行世祀鄉賢

雷鳴春號龍舒少篤孝友博學嗜古治禮經日佩紫陽之教與趙縱江方本菴為性命交登嘉靖己未進士援湖廣孝感知縣清慎勤敏五年奏最擢刑部轉工部出守南陽多治蹟陞省右參議謝政歸官遊二十餘載日以講學明理闢二氏自任所得俸半助友人喪殯嫁娶所著有雪雲樓詩集禮經註疏等書自

陽明倡道東南之後開學院皖江者自鳴春始

段志理學傳
前志宦業傳

顏素字質卿號與樸性耽簡寂非性道之書不貯胸臆天台耿楚侗性命真儒振興絕學奇其文而賞之素結知有道益毅然曰聖人可學而至也體道益力萬歷甲戌成進士授中書舍人尋丁內艱居喪哀毀鄰人罷社再補原官草疏納告身乞歸當事強留不得竟移疾去結廬石門豹嶺之間窮究古今尤邃於易四方從學者日衆二十年不造郡邑之庭再起南大理歷尙寶卿日與袁伯修焦漪園周海門潘雪松諸人相切劘仕至應天府丞卒於官素之學大抵得之程明道陸子靜二先生易簡直截以見性爲宗嘗自言曰人須識學餘姚標舉良知盱江單

提明德見羅直指修身名曰雖殊歸源則一病革時友人咨啟至再拱手謝曰行所無事聽天之命而已又負經濟深識興亡肯綮洞若列眉書法逼似魯公所著有易研六卷

見明史
藝文志詩文

數卷學者私諡爲簡一先生祀鄉賢

段志理學傳
前志儒林

方昇字寅陽邑庠生生平嚴氣正性望之可畏而卽之謙恭虛己常若不足居家言笑不苟讀書必焚盥然後展卷卽宴處一室亦必衣冠危坐訓諸子弟及諸從遊者曰程純公教上蔡以靜坐此是鈍根人初入門處卽主一無適之旨也寒暑惟守性理一篇晚歲尤精易學子應聘婦翁都御史汪道亨出撫宣昇與卮酒言別餽蔬一如平昔語多規箴不涉一諛詞道亨謝教

曰吾始微時奉寅陽爲執友及通籍三十年以來未有如先生之告我以善者先生真古人也其交友直諒如此晚年以恩例授訓導門人私諡曰貞肅先生

段志理學傳

應聘諸生性介直不輕

然諾有陳卜微者官於蜀貸富室千金應聘子都韓質其事後陳不能償富人責償於方曰吾第以君父子故輕付千金豈知有陳氏耶應聘鬻產代完不以介意云

前志篤行傳

游於詩字二南以諸生入太學性耿介不阿好禮學家言事親孝日夕視膳親食然後敢食委曲承歡至老不懈嘗千里負笈從學於盱江羅近溪晚與金陵焦弱侯暨同邑顏質卿輩結里社開示後學一時名彥欲得盱江之精微者非詩無以達其蘊

也倣朱子立義倉八楹於其鄉凶歲賴以全活者數百家卒年七十有五門人王宗文等私諡曰靖康先生弟於禮由太學任山東經歷亦好善散穀賑鄰施耨以殯無主者歿後鄉人祈報必祀之子士進歲貢任峩眉令孫必聖歲貢任洧川令

以上二人段志

理學傳前志篤行傳

王宗文字敬之邑庠生顏素倡道安慶宗文首入其門爲高弟嘗謂大道直於路事事不外於性卽事可以見性物物不離於道因物可以見道若離事物不見性道

劉若實字胤真別號霜石父尚志弟若宰見宦業傳若實以國子生任鴻臚丞尋謝職歸體性淡甯條然塵表善鼓琴手錄孔

孟周程諸書晨起拜之端誦數十簡乃已顏素愛若實穎敏出所著易研授之自是邃於易於寂然不動感而遂通一語頓見聖人體用渾全曰學者當於文字外直接千聖心源慕桐邑方文孝往見之文孝問曰論語首揭學字所學何事若實曰有子註脚甚明非學天學聖但學自己學爲人而已尋見吳宗一往復參証方吳皆嘆服謂若實淳篤似元定超脫如象山共慶得朋之益若實學不守訓詁聞見直截簡易服膺慈湖姚江忽抱疴預知逝期有問先生何處去者曰浩氣還太虛卒葬懷溪黃鵬衝學者私謚曰靜達先生

劉餘清字不疑若實之子也生而穎異讀書十行俱下試輒冠軍淹貫六籍善詩歌古文詞性內方而外和人就之如冬日沈潛理學隨父侍方文孝吳宗一之門講朱子晚年定論直截簡易兩人謂若實曰吾道中一人也後從東林復社諸君子遊聲名益重居喪廬墓三年不入城郭巡撫黃配元以賢良方正聞於朝丁母艱未就時豫章姜曰廣爲海內儒宗親負笈受業與姜排異學共患難爲姜高弟知府李士楨慕其名聘修郡志任蕪湖學司訓五載倡明理學提絜良知之奧以主敬爲宗修舉陽明書院登座講學蕪邑紳士及四方從遊者循牆聽講不下數千人隨叩隨荅娓娓不倦多方開導不作訓詁語有語錄數十卷行世一時臺司郡邑胥以胡安定目之會詔裁小學訓導

諸當事以重餘清故特留蕪湖一員餘清有詩曰新恩用舍關
吾道真千秋盛事也歸隱灤溪日訓子弟以性理之學後微疾
考終謂諸子曰吾平生不負方姜諸先生所教正於此時驗之
所著有易問太極說西銘解正字山居梅花等集訃聞蕪邑諸
學人遙設奠祭奉主於陽明書院私謚爲貞恪先生

以上四人
並據段志

理學
傳補

容若春歲貢生任徽州府訓導整躬垂範學者宗之著有今易

圖學心法釋義十卷

見明史
藝文志

馬遇字時昌號雪齋乙酉城潰年甫十四倉猝顛沛中能竭力
以調護其親鄉里異之性敏嗜古惇行強識於甲乙二部搜羅

極富潛心探討靡不究其指歸外至陰陽醫卜奇門剋擇楊曾
地理諸術亦皆博覽而綜會焉或以其學富謂宜奮身朱紫乘
時樹立而遇惟青毡自守絕無衣錦裝衣裳錦裝裳之詠居平
方整和緩雖拂逆時未嘗急言遽色晚年讀書益富觀理益深
天人性命之原渙然了徹著有太易圖說大易講義皆精微奧
衍能發先儒所未發

清楊昭雍字南有諸生父廷試豪於客昭雍爲延致其老友日
夕燕游無一不辦父病刲股請代母李治家嚴委曲承順得母
一開顏則樂而起舞三黨內有緩急不惜稱貸應之除夕一偷
兒入其室家人將執之昭雍曰此人吾命之來者呼出飲之酒

予之米肉香燭度歲物更予白金爲來春貿易資後數年其人竟致饒裕自陳願倍償前金昭雍曰吾無是也却不受暇時爲市井儉父演說勸世諸書聞者感泣靳中丞輔興復培原書院徵郡邑文行兼優者四人爲之長昭雍與焉郡人咸以爲當夙勤於學以程朱爲宗著有猛省警言克復圖說及訟獄八弊等書以子汝穀貴贈如其官祀鄉賢

徐穀瑞原名穀少字展成父祖儒字述先諸生剗經緝史審音辨畫當世之博者罕及焉穀瑞中康熙戊子舉人雍正間上特恩親揀民牧臨軒召對數陳剴切上悅賜改今名授直隸文安知縣在任三年以儒術飭吏治文安人至今思之著有四書圖

考古學體式考經史疑問孟子文法天文管見星學指南百家關謬方言訂訛字音辨略帖括蒙求見聞隨筆誦芬堂詩古文若干卷

楊家洙字東川歲貢生性樸訥績學植行少雄於文躡唐宋諸大家之庭而窺其室苟投時好弗屑也晚獨研究經義冥追心得不拘守傳註於易尤深著有西樓易說十八卷既成致書於其友江氏濬源略曰六經惟易與春秋尤難治春秋程朱無成書四傳分行兼歷代諸家解說終未灼見屬辭比事之真則折衷書法爲難易得邵圖程朱傳義精深廣大冠絕古今然邵子無註程傳理精而例疏本義亦爲朱子未及改正之書故遺漏

猶多又汨於羣儒之紛紜駁雜易道晦矣蓋嘗論之宋末元初諸儒去程朱未遠淵源有自而學漸膚故經數傳而其說愈差明以四書取士諸儒專精書理而後經學既能墨守傳註而說經實不及元故自講章行而六經之理愈晦易與春秋尤甚焉某之抱憾於此久矣今易說幸已成集君向勉我以羽翼經傳作四聖功臣某敢言此哉亦庶幾闡其歸趣正其舛謬稍補程朱之所未備焉云爾後家洙歿十餘年江氏爲錄其易說貳之稍加裁節

汪德鉞字崇義年十三四健於文舉筆立就從舅氏楊家洙授易又從潛山張氏必剛質問經史生平篤好宋儒書積學砥行一以程朱爲宗俗學掊擊宋賢者德鉞大聲疾呼斥爲無忌憚之尤日與之相牴牾每稱說古今人物至夜分娓娓不倦急朋友之難不惜身犯患苦爲拯全之遇人有過面加責讓旋復自悔終不能改蓋其天性然也嘉慶丙辰進士授庶吉士散館補禮部精繕司主事遷儀制司員外郎保送御史充會典館總纂以譌字被議奪職旋請復需次銓部閉戶讀書日有劄記屢書懲忿窒欲四字自治益力雖夢寐中有不合義者必記以自責嘗兩上朱文正珪書皆古大臣義文正甚重之所著七經及論語大學偶記十餘卷子史偶筆二卷語錄四卷家訓女範二卷古文辭制藝詩各二卷又有周易集成論語講義詩經文字異

同考三國志補註皆未成年六十一卒桐城姚氏鼐爲之志銘謂德鉞少稟承宋儒之言行已有恥深識天下事利病遇義慷慨敢爲使其端行一方施於政事當亦有可觀者惜其仕與學皆未竟而身歿云

李時溥字博齋道光壬午舉人精漢隸規行樂步語無妄發與人接躬躬如畏然博覽典籍尤肆力於經精天文算學著述甚富從之游者亦多通品授壽州學正卒於官所著書有經義考實四卷春秋地理考實等韻解國翰地理圖考天文圖考十二卷算學精蘊十六卷遺稿皆其生徒孫氏所拾襲所刊行者惟經義考實云

馬守愚字古虛一字谷虛咸豐改元舉孝廉方正博學務實踐自經史外於國家掌故九流家言無不究覽顧一納於禮嘗病詞章家不足與言文輒以矜目之因謂學有三失考據家失之瑣理家失之疏矜家失之浮惟學禮可以挽之又曰文者禮之博禮者文之約道之體禮在文先學之序文在禮先又曰易爲制作本原禮爲羣經柢蘊而要以許學識字審音爲梯航學宜動靜交養善學者讀經爲通今不善學者讀經爲博古其子徵慶一本其說發揮而光大之性和易與人無忤然律已嚴人以是憚之值亂倡團練旣平爲經田興校出資助立書院置惇典義學藏書甲鄉里有素行尻書曰徵慶仿四庫例爲題錄刊刻

行世著有知艱錄四卷義學規條一卷二區陳數啟蒙二十四卷忠義小傳二卷風節井遺骸考一篇

以上同治志
馬徵慶分纂

劉發書字授九號獻齋同治紀元舉孝廉方正父煥基客金陵發書時家居一日心動趨視則已遘疾舟中相見執手嗚咽越三日而歿卒得受遺命扶柩歸論者稱爲孝感性迂謹自其父喜推解家貲漸盡發書一承父志不少吝有黠賈某詭以折閱輒不計眞僞爲償所負途遭婦人必迂道謹避之或不及至誤陷泥淖中粵匪竄安慶挈書遠避遇賊輒劫去已而知爲書擲諸地發書復從容收拾之生平謹取與以著述自娛貧窶不形於色卒年八十有二著有儀禮集解十八卷禮節圖一卷大旨

原本注疏參考諸家有未盡者乃下已見理明典覈取達經旨而止

馬徵慶字素臣一字鍾山諸生勤學嗜古精於禮嘗謂禮之精義不貫不可以治羣經又謂士宜明禮經以立體習朝典以致用故所爲禮書準古酌今喪祭尤多訂正曾文正一見嘉嘆稱爲當代大儒諸經小學及讀史方輿沿革均各有撰著多所心得惟釋大學君臣父子之謂物孝敬慈信之謂格自信深合知本之旨而當時守程朱者輒與抵辨不相下生平長於圖譜之學尤見珍異域顧性歛退從文正贊助軍務保盡先補用知縣自請改就教職選太平教諭文正嘗贈以聯云釣竿欲拂珊瑚

樹中史頻傾赤玉盤既就太平任一以身教弟子至有經師人師之目其撰書院楹聯云文亦何奇祇如蜂蜜蠶絲食古自化學能成實便是鳳毛麟角異代同欽又贈諸生聯云學似秋禾須結實文如春樹自生花言中有物亦足見其生平志事云光緒十八年郡守聯元爲呈大吏奏請特獎五品卿銜其著作列經部曰周易正蒙禮原易章大衍筮法直解尙書篇誼正業尙書百篇異同譜毛詩序誼正蒙毛詩鄭譜疏證四詩世次通譜毛詩七聲四音譜學詩多識篇周官徵周官聯事譜考工記注儀禮表讀儀禮提綱禮經索遺禮記正蒙夏小正箋疏禮雅禮譜禮圖詩例春秋律禮經通釋六禮吾從錄家禮外記述訓二

十四卷論孟正蒙學庸小學六藝譜列史部者曰懷寧縣志歷代史志沿革圖說長江圖說素行居藏書目補編書目舉要仙源書院藏書目錄初編列子部者曰三立明辨教學法程勵士淺語勵士參語學蔀隨琴淡園雜錄列集部者曰歷代文誠絕句詩選制藝養氣集淡園集已刻者未及半未刻者多殘佚

濬分纂

文苑

古無以文章名世者馬班史傳儒林之外別無文苑蔚宗而後始標茲目自是判然兩途蓋學之去古日遠矣雖然文無定名惟人所見聖人發育萬物綱紀彝倫之作咸謂之文文也而人

道繫焉矣自有遠人以為道者而道與人分自有遠道以為文者而文與道亦分由歧而亡之將必由歧而返居今日而溯古先未可一蹴幾入道之文道之所賴復乎不可及已若夫因文以見道或望道而未之見當其馳騁藝圃涵泳聖涯心目中固猶有一道之見存焉縱其所至庶幾古作者之風其於吾道蓋亦有沿波討原之致矣彼揣摩塗澤以為工流蕩而忘返不惟遠道以為文又將遠文以為文焉泛斷港沿絕潢以求至於海也不亦誣乎

東漢周興以父榮恩除為郎中少有名譽永甯中尚書陳忠上疏薦興曰臣伏惟古者帝王有所號令言必宏雅辭必溫麗垂於後世列於典經故仲尼嘉唐虞之文章從周室之郁郁臣竊見光祿郎周興孝友之行著於閨門清麗之志聞於州里蘊匱古今博物多聞三墳之篇五典之策無所不覽屬文著辭有可觀採尚書出納帝命為王喉舌臣等既闇昧而諸郎多文俗吏鮮有雅才每為詔文宣示內外轉相求請或以不能而專己自由辭多鄙固興抱奇懷能隨輩棲遲誠可歎息詔乃拜興為尚書郎父榮子景俱見宦業傳

宋李公麟字伯時舒州人

宋史宏簡錄俱作舒州人東郡事略作舒城人誤他書又有作桐城者皆

以龍眠山莊而誤也

第進士歷南康長垣尉泗州錄事參軍陸佃薦為中書門下後省刪定官更御史檢法公麟好古博學長於作詩多

識奇字自夏商以來鐘鼎尊彝皆能考定世次辨測欵識聞一妙品雖捐千金不惜紹聖末朝廷得玉璽著帝王受命之符下禮官諸儒議言人人殊公麟曰秦璽本藍田玉所成今玉色正青以龍蚓鳥魚爲文其質堅甚非昆吾刀蟾肪不可治瑯法中絕真李斯所爲不疑議由是定元符三年病痺致仕肆意於龍眠山巖壑間自號龍眠居士襟度超軼名士交譽之黃庭堅稱其風流不減古人雅善於畫自作山莊圖爲世寶傳寫人物尤精在顧凱之張僧繇之亞故世但以藝傳云

元馮三奇鄉貢進士元夫之子授德安府教授至順初進士爲光山尹遷國史編修預修遼金宋三史擢國子助教累官儒林

郎

明丁相以歲貢入太學任順德府通判於書靡所不究尤長於詩所著有老女吟數十首以自況一時爭傳誦之

張湯成閉戶苦吟經年不出太守天水胡解任有老嫗送至江干齋鷄酒爲獻命諸生紀其事湯成作江頭老婦吟胡一見卽驚曰吾作士二年乃失一湯成令連進數十篇劇加稱賞

秦嘉禾字吾田諸生嘉隆間邑中最稱善書者也太守嘗過其廬嘉禾報以詩曰大龍山人發浩歌沽來一斗剩無多柴關忽報車聲住整理烏巾掃雀羅其高致可見矣

洪雲翼字望洽博洽工文詞萬歷中歲貢任浙江宣平知縣著

能聲解組蕭然賣文自給

於國華副使惟一子博學工詩文書得晉唐遺法而於魯公爲尤深其論屋漏痕折釵股俱極臻其妙

阮自華字堅之浙江巡撫鶚子始遷懷寧萬曆戊戌進士初授福建福州府推官再任江西饒州丁內艱服闋轉戶部郎權稅德州著廉幹聲痛父鶚以望誤奪官伏闕陳情卒得昭雪予祭葬晉陝西慶陽知府慶陽古崆峒地李夢陽故里也爲築室祀之作懷賢賦寓仰止焉崇禎初再起福建邵武知府興利剔蠹不遺餘力亡何以病乞休卒著有霧靈詩集行世自華博極羣書主盟騷雅東海屠隆作四君子詩馮夢楨朱長春虞淳熙其

一則自華也又善草書人皆藏弄爲寶祀鄉賢

吳應鍾字幼元九歲能屬文垂髫卽貫穿全史從父口授未嘗寓目也旣長與阮自華聯海門社肆力於古文辭旁採汲冢諸書及秦漢家奇言非注目深思不能得其句讀詩自大歷以下無取焉嘗過牛渚太白祠撫青蓮背曰時無英雄君獨傲然千古耳萬曆庚子舉於鄉卒年四十七祀鄉賢弟應鉉

何應暹字元旨號虞山萬曆壬子附貢初與給諫宣國柱吏部顏渾讀書陽明庵學以敬爲主以知行並進爲要屢薦不起嘗

與顧涇陽高景逸講學東林爲副教

係天啟甲子年

厥後天下書院廢

與景逸屏迹湖上逾年丁卯景逸死義得景逸別聖遺表兼別

友人書痛哭成疾八月歿於金陵客舍衣篋中僅存錢數百新詩數首著有四書或問辨正朱子輯要近思錄鈔真西山文章正宗鈔古文讀本虞山間集增

吳應鉉字幼玉諸生爲文深穎勃窳理窟多苦思至竟日含毫不倦尤深於詩晚年古樸奇崛不學步古人而歸於自然有遺詩數卷尙存

高漸字進之抗厲希古敦孝砥節髫年母病篤稽首籲天願以身代年十三補諸生卽優古文辭遠近徵求屢滿戶外以選士入對高等判廣安鬱不得志歎曰丈夫不入天祿石渠則邱壑自老耳檻猿籠鳥何爲哉擬淵明歸去來辭以見志投劾而歸

孫必光亦博學著有澗山集經辨纂等書

程之魯字禹璜解州學正泰亨子博洽經史嘗應秋試主司因乾清官災發策舉五行爲問之魯援引洪範傳並鴻烈諸說更出主司意表主司疑而置焉之魯益厭去帖括肆力於古文辭同邑阮自華序其詩以爲妍秀覃奇有雲浮波騰之致崇禎間歲貢授甯國府訓導教士以孝擢溫江教諭著有文脊山房稿諸銳郡廩生博學嗜古劉方伯尙志所嘗從學後置產結廬以酬師德里中豔稱之朱嗣英字天毓拔貢生讀書一過不忘文采卓絕亦成就後學甚衆也子咸修晉修俱以薦任知縣

阮之鏘字南阮崇禎時副貢爲人沈靜蘊藉澹然塵外詩文卓

爾不羣尤工草書筆法峭肆同時程萬里字天池書與之鏘埒皆屢中副車爲士林所惜

容士賓字寅主諸生少穎異讀書日可數卷年甫髫賦四時歌行古韻可誦後益工長篇多至百餘韻無不奇縱幽異有荃園草詩集子爾謙諸生亦刻意力學蚤卒

王國瞻字碩慰幼心朗性明日涉知義讀書斷自漢唐以上文務奇崛性簡淡不妄與人交崇禎戊辰選入南雍著作益富憂憤時事作六害詩以傷之鬱鬱而卒

汪必裕字如之邛州知州之達子幼有文譽及入蜀省親歷三峽登峩眉文益奇肆議者謂得山川之助云崇禎己卯舉於鄉

後上公車以貧瘁卒於道

梁世祥字雍伯選貢授福建南靖知縣未至改霍山訓導精治六書工反切著有楚辭毛詩輯韻

蔣延祐字孔篤諸生讀書嗜古凡金石遺文蝌蚪文字窮力搜索至忘櫛沐崇禎丁丑以次應歲薦岸然弗顧隱虎澗以終
劉若寅字爾敬方伯尙志子諸生博學善屬文嘗避地金陵數年買舟歸皖泊鳩茲水落舟膠泥中若寅作詩投江夜半忽聞水聲潺潺舟移數里子餘謨進士

劉鍾嶽字長秀諸生力學嗜古爲文高古奇肆與同邑阮堅之輩結海門詩社著有百子花厂集

韓長世字克長恩貢生明季避地金陵歸隱於黃荻坂家無斗
筲賦詩自若有竹堂詩集

清吳邦柱字公擎能讀諸史百家窮究原委崇禎間歲貢初任
祁門訓導擢江西樂平知縣不就明季及清初郡縣志三與纂
修當事者詡爲文獻云

吳廷楷字端儀諸生有至性祖某蟻敗其棺將改葬廷楷方童
孺拊膺號泣家人異其生未識祖而傷慟過人也爲文根極理
要出入經史郡邑前後以修志交聘居近子貢嶺自號貢溪年
五十餘卒

董永吉字其旋諸生恬淡溫雅戊子譚將軍太過皖屢辟不就

郡守姚琅聘修郡志上書畫見稱於時

程扶上諸生性孝友居喪哀毀遺產悉讓之昆季家徒四壁晏
如也郡守李士楨聘修府志所著詩文甚富藏於家又劉材字
篤公諸生湛於經史康熙癸丑與纂邑志

韓鼎應字象生諸生少負文采岸然不儕流俗乙酉城潰後棄
舉子業構數椽於湖山間顏其居曰醉陶賦詩飲酒自樂以天
年終

胥茹穎字仲遂一字省雪中康熙丙子順天第二名舉人壬辰
進士預纂子史精華授內閣撰文中書一時誥勅多出其手茹
穎淹貫經史長於詩規撫少陵尤工潑墨作畫一松一菊一竹

一石皆書寫其磊砢磅礴之致得之者什襲珍焉兄蔚林字抱雪一字寶壑國子生官浙江會稽知縣時稱二胥詩文書畫爲八絕蓋並兄弟而稱之也

阮懋棠字召樹工部涵子諸生性亢爽讀書梅渚間二十年究心史學著有史哲史取讀史補論修如堂近稿輯韻採窮草諸集

方都鎬字周士諸生工詩亦精書法別構草亭雲峯下聽瀑尋雲有終焉之志著有草堂詩略

曹天寵字蓼溥諸生著有春秋三傳纂註兼明象緯之學崇禎間以家徙於鄉謂所親曰城內不可居也亡何左兵果叛皖城潰焉

程從大字子先歲貢生以母老不仕母卒廬墓著詠莊詩集後任潁州訓導子師恭字蜀材拔貢生十歲通五經喜著書有歷朝史斷韻府羣書及註釋陳檢討維崧四六行世授四川永川知縣年老乞休卒子景渭康熙丁酉舉人

宣魯字紹曾康熙乙酉舉人善楷書爲時所珍著有甯山堂文稿荆山吳士玉序以行世

程畢臣字東釐七歲卽精小楷詩幽峭酷類郊島爲徐公乾學所賞卒年三十時論惜之何棐字篤侯亦蚤歿著有來山堂詩集燈巖文德翼爲序之

於穀字嘉禾諸生於書靡不涉覽然只取給爲詩著有窮愁集藏於家

劉餘璜字黃玉諭德若宰子年十九贅於桐爲桐諸生生平落落寡合不喜與貴人顯者語讀書務求心得程朱之理皆能究其精蘊而口弗道也所爲詩不自收拾輒隨手散去子輝祖捷劉輝祖字北固家貧少授經舅氏家寄籍桐城中康熙庚午第一名舉人時桐城方舟與其弟苞以文名天下輝祖及弟捷最與友善亦以有文章志行與齊名輝祖所著北固時文稿藕浦詩古文集四十卷後客廣東歸過江夏遇疾卒方氏苞爲作哀詞輝祖故名家子祖若宰明崇禎戊辰及第第一人輝祖舉鄉

試第一及辛卯弟捷復舉第一宋明科目有三試皆第一者清朝初尙無有衆方以望輝祖捷安溪李文貞公光地己丑典會試偶闡中語及輝祖或曰噫死矣公爲太息者累日輝祖卒捷亦老得一科終已不遇

劉捷字古塘與同產兄輝祖並有聞寄籍江寧爲江寧學諸生貌精悍少以雄豪自處短衣厲飾恥見者知爲儒生其爲行篤自信而不牽於衆文亦然有同姓名者武生大患鄉里督學邵嗣堯聞之而未察捷入試忽命榜筭數十已知其誤置其文四等衆大譁羣起而詬之邵一夕愧恨發疾死遂寧張公鵬翮督學江南招入使院有故人夜詣捷出千金爲其姻家請事捷曰

不意君以此等待予年羹堯巡撫四川固請與偕議加賦力爭而止遂以他故行曰其心神外我矣能守吾言以期月邪及督川陝復固請以往再三見浹日而歸捷家甚貧僦屋窮巷無一畝之田以名在天下諸大府常不遠數千里厚幣招之歸解裝得數十百金遇親交隨手盡俄而乏絕饑不得餐晏如也康熙辛卯中式第一名舉人磨勘停一科癸巳秋特行會試適其友方苞以南山集牽連編旗籍檄解妻子北上捷曰吾不可不偕行至京師試期已過後病且衰竟未一與禮部試年六十九卒著有古塘詩文集若干卷苞作四君子傳捷其一也及葬爲之誌銘

方都秦字百二諸生以詩古文名一時爲院士雄長晚益嗜學棄明經不就伏處巖谷窮經著書以自娛有梅溪文集六卷嶺

雲詩集

卷康熙初與纂縣志

都秦有孔門出妻辨舊載府縣藝文志按伯魚之母死期而猶

哭父在爲母服期祥外無哭喪禮則然檀弓無出妻說也誤緣於穎達之疏矣子上之母死而不喪先儒謂出母卽生母不爲妻者明其厭於嫡也猶之王子母死請數月之喪爲欲終之而不可得云爾至子思之母死於衛則伯魚年五十而卒妻復改嫁邪則檀弓氏傳聞之誤焉出妻云者孔氏所必無之事不足深辨也

蔣生芝字鍾玉歲貢生任寶應訓導旋引疾歸結茅於院口之獅嶺湖光山色四時謠詠翛然埃壒之表書畫鐫篆各臻佳妙而書尤得名諸官署祠廟碑版多出其手畫用焦墨皴而不染喜作枯木竹石瘦硬通神皆書之餘也歿後人得其片紙一抹

珍如拱璧至市賈多方購求居之以獲厚利焉著有獅嶺草堂詩稿

汪宗周字瑤若御史游龍子歲貢生官江西德化縣訓導亦能詩不事雕琢真趣宛然著有敦好堂詩集

蔣瑤芝字素書晚號老客諸生家貧憤志讀書邃於經學旁及

老釋靡不通曉顧於時流少所許可又值兵燹之餘離黍興悲

不樂仕進激昂慷慨之致往往見之於詩長篇短詠直追三唐

尤以少陵為宗善得其意趣同時足當唱和者惟汪之順宗周

范又蠡數人而已

瑤芝嘗謂自帖括盛而風雅衰皖人士尤習其隅見習說如村謳牧唱借以適機終難脫俗即或摹倣古人競趨浮響杳無神致而荒疏之流借眼前月露風雲故作迭宕

至於詠史紀事敷陳典則論斷發揮則無措手又云學古人在精神不在字句必有一段不可磨滅處氣骨神理乃能逼真古人故曰法尚應捨何言著夜光集五百餘首吳下故人將為刊之况非法世以為知言

會兵變不果三韓佟世思招往粵西有五嶺紀遊諸詩風骨迥

上勝其少作旅食六載竟歿於桂林

韓寵字第七諸生明大參一光後也母盛通經史能詩所作多

事親相夫訓子勗婦之章人比之大家七誠寵詩清穩五律尤

勝著有菊莊詩集

魯士清字啟我質穎力學少讀書研究入微一字不肯忽過人

服其精貫貧不能多置書每就肆取觀悉能默識雅好為詩同

時劉爾敬若寅白瑕仲瑜多與之唱和著有鶴林集卒年二十

四儒林惜之

劉慶雯字喬三年十一作春賦數千言郊居雌霓讀者往往失音慶雯匿笑長者目之避去再讀並字不能識矣呼慶雯不至急檢字書盡一賦數十檢所爲五言雜詩論古有識山居詩幽邃不類人間語年十三病殤有半松軒遺詩二卷

金永字方思歲貢生早歲能文爲靳文襄公輔所賞官上元訓導諄誨後進經指授者文章行誼悉有法度可觀年八十餘卒永爲文有真氣清澹古宕夔絕塵表詩五言兼有孟襄陽之逸柳柳州之潔著黃葉村莊文集八卷詩集二十四卷

康慶雲字燦斗乾隆戊申進士任直隸深澤知縣卒年三十有

一慶雲善屬文隨所欲言意盡而止蓋得大蘇之雄快著有制藝雜文若干首

朱衣點字繼伯諸生少負經世之志困居下訖不得施遇縣有大事輒發憤爲民請命諸有益於民者自忘其身之賤而有痛乎其言也康熙癸酉某郡大饑民流入懷境者千餘人臬使某將下令逐之衣點爲上書言狀得免逐雍正丙午歲饑中丞魏公請賑於朝衣點復上便民六策議多可採著有養元集一卷藏於家

戴齡字鶴年諸生勤苦嗜學汎覽諸子百家一室丹鉛終老不輟憤俗學治經但取供舉業因輯儒先傳說附辨論焉有周易

辨占集解六卷麟經解略四卷

黎雨稼字耕書諸生書畫並入能品詩蒼潔幽秀於五古尤長著有雲松書塢自長吟等集弟漆字超顏一字渭北諸生亦能詩著榆門詩集

鄭道明字希濂號松岡副貢生敦篤好古晚嬰足疾益究心宋儒之學貫串經史有得輒記成帙年七十鑽研弗衰著有續箋山房集錄十餘卷乾隆四十年開四庫全書館丁給諫田樹以其書上得列子部雜家提要稱其於宋儒寸寸尺尺惟恐有一毫之不似焉又著松岡學吟集

陳從王字作穎幼失怙哀毀如成人事大母及母盡孝家貧授徒於外忽中夜心動遽奔歸而母果病內無昆弟惟妹二人友愛甚篤嘗從望溪方氏苞授古文學方氏嘆謂敦實行能文章如陳生者殆不多得乾隆庚午舉人官嘉定縣教諭

丁田樹字晉占乾隆辛未進士改庶吉士授職編修歷河南山東道御史有聲壬午科四川副考官擢禮科給事中巡視中城因事左遷選兵部主事洊升郎中引疾歸主講大梁書院卒於汴著粵遊蜀遊北遊等草又館閣詩賦十餘冊制藝早得名上江有七子文鈔田樹其一也

王大有字軼賢穎敏善屬文一日可十數藝少時以七藝補諸生乾隆庚午鄉試五藝中式辛未會試取第六進呈上閱其二

場經文二十藝嘆爲長才疑有弊置之旋考取教習選江南東台知縣因母疾未就而卒

張法可字袖山乾隆丙戌進士父歿時法可甫五齡母楊泣於帷輒跪而請曰有兒在母何悲之甚聞者皆爲隕涕及長能以友愛弟兄遂其孝養植學有文名與同邑徐世錦楊全蘊魯琢稱皖江四子弟時可字寶山諸生亦能文稱張氏二山

張啟字虎人雪鴻其號也父若谷官山東嶧縣知縣啟兄弟並有才名敕以書敷以文啟以畫時人呼爲三絕寄籍歷城啟中乾隆壬午舉人任湖北房縣知縣大府重啟名以之攝江夏令三閱月不耐走謁忽數日匿不出遣覘之則方據一席伸紙作

畫傲睨不知有人大府怒檄歸房尋以寄籍故罷官房縣民走千里詣大府乞留竟坐前謾已弗省敕拔貢生啟乾隆丙戌進士

李勉字嘯村諸生兄荃字佩湘乾隆戊午舉人著有偶一詩勉生而穎異總角應童子試輒冠一軍詩以手立成如不經意而新警雋拔無一字拾人牙慧督學俞公按院試春江詩筆不停揮成七言律三十首俞大驚有國士之目客遊金陵維揚間數十年當道重其才爭禮之然卒落拓無所遇勉亦不以非分干人雍正乙卯試博學鴻詞兩淮都轉盧氏見曾以勉名薦爲學使者放歸乾隆辛未上南巡召試賜宮緞及內造針黹等物勉

嘗登燕子磯絕句云年年高臥非關懶許大江南沒處飛蓋自傷老且窮也勉工於近體不爲古詩有嘯村近體詩三卷盧爲鋟板序之

黃浩浩字嘯江性不耐爲制舉文或勸應童子試詩輒工而文被黜再試自寫詩於卷首又格功令見擯遂棄去所爲詩不樂示人每一篇成輒焚其稿既歿友人魯琢爲搜其散佚者刻有綠蘿館遺詩

江臚元字嘯酣國子生善書畫能詩與李嘯村勉黃嘯江浩浩齊名時稱爲皖江三嘯著有適性編太史軒轅誥爲之贊

范宗河字見龍歲貢生父建機諸生有孝行親歿廬墓哀毀子

四宗淮宗河宗漢宗海俱有文名時謂之范氏四龍宗淮字西來諸生宗河性高介於世俗落落然文清潔簡貴略似羅文止而不失之蹇澁朗雋故有餘也遺稿數十篇尙存宗漢字赤龍諸生宗海字滄龍歲貢生工駢體文

路一清字田見副貢生敏資嗜學爲文不屑屑於規仿著有澄溪遺稿三卷制藝存者數十篇卒年三十二以子華仕贈奉政大夫

魯琢字研山乾隆丙子舉人授雲南浪穹知縣以病歸改任鳳陽府訓導琢爲文出入經史詩開宕有氣不拘一格而能兼用所長著有南莊文鈔八卷詩鈔十四卷又執經記八卷強識錄

四卷格致邇言四卷如圃詩話林下清談各若干卷所選院中詩略搜輯散亡堪備一邑文獻弟瑣字七衡恩貢生歷任無爲和州學正徽州教授學有本原詩亦兄琢之亞沈宗伯德潛稱其清和古澹漸幾自然袁簡齋枚亦謂星村嘯村爲院詩人表著者嘯村則李薊星村瑣號也著有星村詩鈔管窺集瑣事合編又工書神似米襄陽善墨蘭

徐夢麟字天台恩貢生提督馬大用聘爲幕賓事必諮訪荆川之功夢麟與有力焉晚精於詩律與丁郎中田樹蔣中書雍植詩人李薊相酬唱有晚香堂詩集

徐世錦字肇杓乾隆壬辰進士績學工文以母老不仕釋褐後

仍授徒自給爲塾師以老著周禮綜讀大易括言等書弟世銘字敬之攻苦強記亦有文名乾隆癸卯舉人

翁立準字愚亭乾隆乙未進士母老不就銓選或勸之仕則曰古人不以三公易一日之養秣陵三品縣亦不必爲况七品官邪主講蕪湖書院數年多所成就立準內行敦篤而遇事倜儻有才其爲文清華流美無世俗氣非同輩諸子所及也著有愚亭詩文鈔數卷

趙有容字振翰幼英異從其祖父嶽麓讀書能盡傳其業初應童子試邑令陳儻儀甚器愛之補諸生以貧授徒館於廣村楊氏者數十載其爲文始則恣肆汪洋風泉湧發繼乃漱滌渣滓

進求雅醇而益厚之以根源適之以魄力晚兼怡情題詠每有所作酷學盛唐諸家以謂取法乎上祇得其中溫李以下弗善也著有涵齋詩文集

段堂字學瞻乾隆辛卯舉人曾祖爽字菊思歲貢生任當塗教諭有能詩聲堂性恬靜好讀書其爲文不矜才務奇優柔平中首尾絲密有體家故寒素田無數畝所資生徒修脯而已自公車數上家益貧戚某官廣東堂往告助冀得貲再赴禮部試一決不獲售則鍵戶作經生師老焉去數月歸中道而歿

方達字澗泉乾隆甲午舉人篤學嗜古每冬夜讀書寒甚足踏鹿盧以自溫早喪母事繼母甚以孝聞或怒諸弟必達請乃解歲得館穀以贍諸弟饘粥並以佐遊宦資撫羣姪有恩及翁氏孤甥皆親授之學達通貫經義但以資生徒講授不自著書文多里閭應酬之作困於無所用其才然至其工者則亦彬彬雅可誦也晚有目疾絕意進取其弟子多掇科第仕至大官云著有竹圃文集

孟非襲字連城兩中副車有異才能記九經註疏一日爲文數篇他人文敏者多平易孟則每藝輒勝貌骯髒不修飾健飲啖年五十餘感風疾歿文稿散佚得者每秘藏之

汪潛字交六諸生少有才名閔公鶚元爲臬使時扁廳試士士納卷畢漏三下潛猶大呼索燭閔公怒使視其卷才字數行耳

姑予之比天明守門吏喃喃罵之始出榜發名第一往謁公公
迎笑曰半夜叫呼狂生無狀吾意贈之以掌今文乃奇橫如是
他人十晝夜弗能爲也大爲之激賞後年二十餘而歿

余鵬年字伯扶乾隆丙午舉人與弟鵬翀並以才名幼從祖崙
遊宦常州爲沈宗伯德潛儲宗丞麟趾所器重並受知於督學
朱公筠鵬年貌清癯工詩善畫豪於酒所至以酒自隨家貧遊
幕四方得金錢隨手輒盡年四十餘卒所爲詩渾脫瀏漓一往
駿利出入於高季迪何大復之間著有飲江光閣詩鈔十餘卷
余鵬翀字少雲諸生甫五歲縱讀經史百子上口不忘間務博
覽爲詞章出語必驚人稍長往來河洛關隴間遊覽有作至京

師朱公筠出以示人曰讀萬卷書行萬里路貧賤依人能自樹
立不意得之弱冠一時大人先生交口讚譽爭欲致之門下然
鵬翀終未嘗輕投一刺以爲聲援愈以此取重廷尉某公延纂
一統志纂修官某亦老宿舊有名每修書上中多沿誤地理故
蹟尤甚鵬翀痛加勘訂書獲完善因以結怨於修纂者且膺衆
嫉尋復以京兆試報罷慨然曰半世章縫事可知歸爲得也因
別號息六以見志卒年僅二十有八鵬翀詩以格勝落筆多仙
語鬼語詞學白石東坡稼軒小令偶仿秦學士畫工水墨山水
王尚書昶謂近世毛進士董上舍皆以畫名京師獨鵬翀別饒
書卷著有韓文公文集編年考喪大禮考息六齋文集四卷詞

曲遺稿二卷

江景綸字韻清乾隆己酉舉人自幼凝重屏絕外營讀書務切究所以然之蘊從疑入悟若有隔之者然稍長爲文能驚其座人鄉先輩楊東川家洙嘗評其文以爲妥帖排奐獨往獨來魯研山琢日昂昂若千里之駒蹀躞騰上下視餘子皆執鞭者也卒年三十有三著有經畚文稿數十篇

劉家瑛字若冲諸生少從望江曹京學殫力於古不屑屑世俗之文京嘗以國士目之性孤澹晚絕人事閉一室終日著書自娛歿無子所著有左國分註三十卷月令類註二卷詩古文集今皆散亡獨制藝數十篇里塾傳誦

楊名昇字東有嘉慶丙辰進士己未殿試授刑部四川司主事勤慎有治聲洊擢湖廣司郎中出爲貴州安順府知府未至任卒名昇嗜學工制舉文自爲諸生試輒冠其曹又善教人仕京師生徒就之講學課文輒掇科以去著有陽谷制藝若干篇潘瑛字蘭如諸生有詩名游江淮間與亳州刺史李廷儀滁州詩人張葆光相唱和有晉希堂詩集二卷勞崇煦字竹如諸生從瑛學詩名亞於瑛而清氣非瑛所及著有壽樗詩稿

查振字鐵崖國子生九歲能屬文貌清而體癯好苦吟復豪於飲年二十一以療疾歿桐城姚氏孀稱其五七言極有清韻陽湖惲敬亦謂振詩在潘瑛伯仲之間而以年不永爲可惜云

以上

道光志江
爾維分纂

江爾維字季持父濬源事具仕業傳爾維嘉慶癸酉拔貢生己卯舉人少習詩爲桐城姚鼐所激賞晚年詩益工自定其集曰七峰詩稿友人陳世鎔爲選刻附汪之順余鵬年兩家詩後名曰院江三家詩鈔道光初巡撫陶澍議創安徽專志檄州縣修志備採摭懷志人物一門大半爾維所續輯命筆尤精審因志中立名宦傳以示勸亦立貪墨傳示懲知縣趙梅不可乃止兄六人景綸見前傳四景綬字復齋六景紱字學圃皆有文名景綬中年絕意進取究青島白鶴之術爲先人求葬地時於驢背上浩然吟嘯聲琅琅振山谷景紱南北闡數十人不遇則以挑

取膽錄就嵯巖選授揚州梁塚場大使嵯職舊習官必與商交結資其沾溉景紱在任六年不染毫髮於竈務頗有所整頓去之日囊橐無贏惟謀刻其花萼齋續稿而已

李川衡字越岑歲貢生敏慧勤學博通經籍尤邃於易又得諸庄張森傳精數學占多奇中年六十自知次年病歿日時爲楹聯以自挽所著有易象諦釋十五卷周官辨義八卷讀經偶錄三卷經義集要九卷字書便覽九卷畜德篇二卷羣書節鈔三卷景岳節鈔十二卷詩文雜集華穠字超凡川衡之族諸生聰穎有才應童子試知縣鄭交泰試以梅花詩百首奇之晚年著有春秋類疏十六卷舟泰字郭欽川衡弟諸生亦聰慧治小學

及堪輿家言亦有所論著云

江本培字固堂性寬和與人無忤尤篤厚於倫紀兩兄早世平生束脩膏火之資悉以分贍孤孀族內多賴其教且養以成立者學有根柢人爭師之門弟子親承其講授取科第者相望故館穀所入爲豐然至老而家徒壁立由附增食餼而鄉貢歷四朝咸豐初欽賜舉人國子監學正銜省垣失守時赴試京師歸見兵燹之慘人民蕭條遂痛哭而喪其明卒年八十有八著有存雅齋詠史詩三千餘篇凡數十卷

葛高翥字軒雲誕生前一夕家人夢有鶴舞於庭故名及長長軀挺立其聲清越幼讀書過目成誦博覽載籍得其精要爲文清言逸韻儵然有凌雲之致成童食廩餼甫逾弱冠以優行首選入都前學使朱士彥見之嘆曰名下無虛士也丁西北闈中式辛丑入翰林甲辰授編修事親先意承志與兩兄芳及高狝友愛備至接物務爲恭謹與村農語無惰容居喪哀毀逾恒親尋葬地無寒暑徒行風日中形容枯槁見者爲駭年四十餘卒未展其用朝野惜之詩古文詞蒼勁有法經兵燹皆散佚

潘慎生字子慎父鈞見忠義傳慎生順天鄉試舉人負奇氣橐筆游齊魯燕趙間抗交賢士大夫歷主講沂水卜里書院所至有才名天資英敏讀書過目輒能記憶中年感憤身世吟前史慨三十章人但驚其奧博而於孤詞微旨非破萬卷者卒無由

領取在都上元梅曾亮桂林龍啟瑞朱琦皆以文字相結納性豪俠不羈每縱飲得千金隨手散盡有某令坐屈落職敦請屬詞平反竟復其官一時傳爲佳話年四十餘卒於汾州客次著有微息齋遺詩香樊遺稿綠生囊詞空青館詞

吳楫字仙槎歲貢生性和而介嗜學不厭文才富麗以博雅見稱於時所著經說詩文經亂皆散佚

馬汝舟字曉帆增生天性孝友少時父病冬月冒雪赴遠地求醫足盡腫裂貧無立錫地束脩所入皆分潤二弟及從姪賦性眞率不事修飾幕遊糊口無所唯阿不合則拂然而去然隨事匡正多所裨益識者賴之芥視名利嘗佐州縣有軍功保教職

輒推與其弟曾文正公收復省垣大試士於安慶首拔之授以團防之任辭不就精醫工古近體詩著有曉帆詩選

王壽雲字根石布衣甘貧力學尤長於詩安慶陷後憤懣憔悴時時見於吟咏病篤自檢其稿焚之今所存讀畫山房詩鈔聽

香居吟草各一卷皆其子所拾襲云

以上同治志
馬徵慶分纂

金濟字巨川淡榮利以著述自娛有幼學廣註千字文註釋等書行世少嘗試於學使以文詰屈多奇字不爲閱者所識擯之比學使行卽與前袖文言屈學使慰諭有加以布衣終甘露字竹岡廩膳生少穎異善屬文氣迥而格高隱居教授學者宗之姜毓奇字石青延嗣次子增貢生性純孝內外無間言事兄雍

雍然每見必進退有度雖至晚年弗敢越居恒不慕榮利吟詠自娛時與陳世鎔相倡和喜遊嘗往來甯巢楚汴間曾掌汴邳邑書院著有勞人草草寄閒存草等集子文吉謹厚仕汴仕黔得民心文治仕鄂有政聲著有潛輝草堂詩存風塵詠集二種朱開號問霖邑增生內行敦厚嘗築一靜室曰稻花樓讀書其中寒暑不輟而尤嗜周易及諸秘籍文著有修養窩耕餘偶筆內經說一卷古文一卷周易顯晦四卷吟草一卷待用軒六壬六卷修養窩奇門遁甲二卷悔遲軒文集四卷制藝試帖各一卷

楊達字學乾歲貢生性肫摯幼失恃事後母以孝聞待兄弟資助不吝生平刻苦好學教子弟必以先賢嘉言懿行相勗勉自以資魯不肯自棄取易終日乾乾句以自警因自字學乾著有書經辨要詩經辨要詠史詩列姓先賢錄各一卷

鄧傳密字守之號少白父石如見隱逸傳傳密生十一歲而孤卒能紹述先業而昌大之初受知武進李兆洛潔游浙粵教育如子弟然新城陳用光仁和龔自珍何紹基邵陽魏源涇包世臣皆引重與交傳密籍是搜訪其父遺墨壽金石咸豐間轉徙江湘十餘年歷主濂溪湘鄉石鼓書院名益起其在金陵時曾爲啟乞住惜陰書舍欽奇典核人以爲足踵其父寄鶴書名山得此增重焉亂定居故里數年年七十餘卒當時鉅公如胡文

忠曾勇毅彭剛直無不重其學憐其遇經紀其家而左文襄以大少篆自重平生私淑其父與傳密周旋尤至云

李魁第字侶梅號北垣邑增生家貧授徒自給尤刻苦自勵每晨起讀經或披子史塗乙丹黃鉤提立要必鈔錄之應試屢冠其曹爲曾文正彭剛直朱學使所契賞文賦刻入安徽試牘中甚夥選辛酉拔貢中甲子鄉試舉人以國史館謄錄議叙知縣性淡泊不與外事好爲詩以寫生平顛沛流離狀況姊適任氏早寡撫其孤甥歲周濟之教姪如己子顏所築室曰管竹山莊著有四字鑑姓氏族譜合編小錦囊四字典四書典林合璧龍眠山館詩賦文集

方朔字小東號頑仙幼岐嶷嘗從杭州沈眉生游獲覽羣書遍歷吳楚年十八以古學冠其曹受知於沈小湖學使八郡庠年二十爲德楞泰之曾孫希元侯爵上客益酷讀築室於金陵邀笛步水關牙籤充棟自名其堂曰枕經爲人落落寡合嘗忤權貴以同知需次江蘇好金石籀斯之學隸法直追兩漢著有枕經堂文集二卷詩集八卷駢體文三卷金石題跋三卷談瀛徵實八卷

裴子虛字標亭生平落落寡合不濟流俗少健於文舉筆卽就研經義不爲傳註所拘著有論語檢正編頗能闡程朱所未備云

舒卓元字調笙父珍見篤行卓元少負奇氣道光己酉拔貢咸豐己未考取八旗漢教習傳補鑲白旗教習期滿授知縣能古今文及古近體詩性兀傲佐大司馬彭剛直幕十餘年以故彭公中年文字多出其手不解曲徇世人敬而憚之累功保加花翎同知銜晚年改教職署宣城教諭旋選含山教諭卒於官著有說易一卷強恕堂詩十七卷駢體文一卷散體文一卷制藝若干卷長子士雋另有傳見仕業次士宏號毅卿庠生三士寬號少岑訓導俱以能文名士寬復善丹青

查夢璧號淡峯邑諸生好讀書恬淡寡慾斷齏粥晏如也每授徒遇子弟之貧乏而穎悟者輒以膏火爲文以歸震川爲宗詩則於陶爲近著有古文隨筆一卷院詩略鈔二卷淡峯詩鈔二卷皆直抒胸臆不假雕琢以爲工晚歲兩目俱瞽終日兀坐一室不出戶庭者十年易簣之前一夕命家人先整衣冠及明端坐而逝

江紀字耕尹一字振基號楚帆諸生直諒明練於世不妄交既契合終身弗渝見善喜稱譽有不可輒面折之黠悍者往往爲之意沮善決事可否於盤錯轆轤一語便了解每燭事後成敗無弗驗者家窶艱授徒自給好爲詩風格雅近陶韋有所作匿不示人偶出觀爲人稱奇多非己意也著有藹園詩鈔數卷與弟錯相依四十餘年終身無迂色嘗館雨華庵離家里許晨往

暮歸兄弟環坐一燈共語夜參半不輟會從李傅相克常州保訓導檄至紀已歿錯子鐘騏候選巡檢爲人恬介不矜崖岸郝同箴號仲賡父滙江精岐黃術活人無算晚歲生同箴家教綦嚴不稍假辭色同箴幼有神童之目十二歲咏永水庵二月桂云廣寒昨夜詔書催特遣秋花破例開同邑陳世鎔見而嘆曰此詞翰才也因益自刻勵博稽羣書上窺姚姒下逮莊騷而尤有志於經世之學年甫冠列成均粵匪之變全院淪陷髮酋逼考僞職同箴抗節不屈間詣京師途遇盜劫屢瀕於危族叔某攝山西翼城篆同箴往依之抵太原書院課士同箴竄名其中主講某公閱其文驚曰此非幽并之音遣使偵悉大加器

重餽資齎送赴都是科爲同治壬戌恩科同箴領順天鄉薦乙丑成進士入詞館桐城吳汝綸同箴會榜同年以文字相切劘嘗謂人曰懷寧郝某予生平畏友也其推重如此戊辰散館改官吏部考功司主事嗣掌考功司印兼驗封司掌印以資轉員外郎主管安徽京官印結局七年同鄉有貧不能出資者同箴稱貸以助士論賢之大宗伯徐桐愛同箴才著作多出其手性倔强嘗以言語忤旨故躡蹀郎署垂三十年光緒己丑考取御史記名庚寅十二月卒於官遺稿多散失所存者僅甌山堂文集一卷駢體文鈔兩卷都門雜錄四卷子戶部山東司主事啟琛能文早逝後有劉貽璋發書曾孫字特甫幼穎悟刻苦好學

喜手錄入務實學堂甫逾年成詩文數冊十七嘔血卒其父文虎爲刪存惜陰日記二卷務實文存一卷

魯鵬字幼峰常子光緒丙子舉人庚辰進士癸未殿試改庶吉士散館授編修截取知府分發江西署撫州府事加道銜性高潔不樂仕進喜西湖山水常僦居以吟詠自遣著有吟梅仙館詩經曲園俞樾鑒定刊行

王國翰字者香附貢生生平讀書不斤斤於章句嘗謂聖賢之微言大義在乎身體力行有以經義質者則諄諄講說不憚其煩與諸同志結文社一以實學互相切劘著有歷代政紀學紀兵紀三篇都三十二卷

劉訓煌字筱儕晚號覺庄廩貢生有筠子幼有異秉讀書日數行下弱冠爲文下筆輒數千言困棘闈薦取皆不售就教職歷署貴池英山渦陽南陵廬州等學訓導有政聲自廬州歸息影於城南鳳鳴書院非歛關問字者不與接當道聞其賢屬以清節堂救生局育嬰堂三善舉訓煌辭清節堂就救生局育嬰堂事興廢繼絕名重一時著有詩古文若干卷

沈元鼎號矜薌工制藝文與同里葛振元齊名葛文以品格勝元鼎以法度勝一時院上士林稱慕之光緒己卯登賢書家貧遊遼瀋間賣文養親曹軍門克忠嘗引爲上客又隨吳軍門長慶至朝鮮平閱匪亂保奏知縣三屆選期而輒以貧故相左庚

子客天津適遭拳匪之禍備極流離踰年今大總統袁公時督直隸以金四百資之行抵山東未幾病歿撫署中元鼎性情遲緩雅不善趨時雖名動公卿間而所遇不終卒窮且死近日文士之厄殆無有過之者焉

楊變坡字瑞甫幼聰穎光緒己卯己丑兩中副車癸巳登賢書以知縣需次金陵生平刻苦好學每黎明卽起家貧課徒自給暇則搦管記所得積紙盈篋笥偶遊必携卷自隨喜研農桑醫術於西書尤究心探討診人疾有告輒往不索謝謂吾借是展濟物心耳與老農話桑麻嘗取新舊法試之輒善因就所居顏曰藝園遇異種嘉穀必百計購之歸掘地督其子試之餘則廣

傳於人至今鄉農利賴之在金陵曾上農桑條陳數千言方伯黃建筦大奇之將不次擢用旋卒著有醫餘留考圖欵萃新各一卷靈素要略二卷醫學探原二卷藝園詩文若干篇

洪思齊號月坡少豪邁自喜不斤斤於制藝之學好爲古文及古近體詩氣勢雄放於大蘇爲近間作小品亦疏宕有致行草書始宗東坡後撫晉魏均能指揮如意早失怙弱冠後奉母客天津借筆耕供甘旨母輒顧而樂之光緒辛卯舉於鄉踰年以通判需次江蘇留數月意弗之屑棄去復北上旋丁母憂田是或寄津門或寓都下而以贅來乞文與書者踵日相接顧揮金如土所得潤筆隨手盡明日囊無錢則又取給於書若文焉以

謀一醉其風趣如此

葉元吉字子謙諸生性敦篤能詩兼工行楷書冠卿中丞之姪羣從多以郎官道府顯於時元吉獨不求聞達嘗構懷園一楹蒔花種竹讀書其中非素有舊者不得接詩慕宛陵饒深遠古淡之趣其閑情秉正較宛陵之間尙奇巧若又過之著作概以懷園名篇合肥李經達嘗鈔其詩二卷刊行

鄭承梅號涓川廩貢生少見重於同里陳世鎔世鎔治漢學藏書甚富嘗延至其家使縱觀之由是累年寢饋凡經史子集之屬不但心通其義並能口熟其詞博洽遂爲一邑冠惟古樸與人接略通寒暄數語餘惟默然端坐而已獨至於辯難古今則

風發泉湧娓娓不窮在清代考據家中幾可增置一席爲文長於經解妙緒紛綸惜隨手散棄稿不傳他若里閭應酬之作時俗艷稱非其至者不足爲涓川異也從弟承鹽號弼臣廩貢生敦學行善擘窠大字名亞於涓川而亦爲學者所推

陳同禮字潤甫癸未翰林性和藹平易近人嘗曰天地間何一可以任性可以使氣其度量超越朝野人士羣推爲公輔器也以文字結主知四持文衡得士凡千餘人皆以道義相助不尙標榜不持門戶工詩畫雖零縑片紙世皆愛重而珍秘之然不常作也甲午後國勢寢衰同禮絕意仕進寄居蕪湖隱於商遂齋志以歿人多惜之

魯震字夢霆祖常見忠義父驥見篤行驥性喜酒震日侍飲陶然後遭父喪絕不飲叔父鵬官江西知府無子震時時往侍叔父病臥誦經自遣或不能誦卽坐旁誦以娛之嘗客關東歸途盜尾之行偶與語驚爲長者轉護之過盜蹤迹地其誠能動物率類此震貌渾和風規嚴峻於人具特鑿喜留心經世之略而天懷澹逸興趣灑然似淵明和靖所居階前植梅菊客來相對流連終日興至則縱論古今發語輒出人意表爲文高古光緒戊子赴江南鄉試主考李文田得震文疑爲崇禎人舊作不敢取遂以諸生終光緒中新學甫萌震昕夕披覽討論導引後進及旣盛絕口不言長官聞名或以事相邀輒畏匿避去曉詩律

顧不肯多作偶爲菊花詩意態閒遠友好爭傳誦之好山水精形家言來往吳越贛楚間兩游關東一至日本皆縱覽其勝卒年五十七一子燾甚才年二十四溺死聞者悼之

鄧執孫字繩侯號世白祖傳密執孫幼從祖絜游荆湘間爲當代鉅公所器異年十七補邑庠生嘯歌山林以故書遺墨自娛歷任蕪湖公學總理省城師範學堂齋務長兼經學教員辛亥八月民軍起武昌皖垣士民驚潰出支危局旣定任教育司以母喪去職任高等校校長卒年五十七識度俊偉天懷坦直於士類喜激揚一見當可心口交譽已而乖離絕不瞻徇雖其久敬者或不當意亦必正色相告也每當大事於稠人廣坐中論

列可否輸誠傾與不稍假借南北賢豪以是欽慕其人爭相結納會叔季多變新舊學說恒齟齬不入執孫一折衷之於經孰研詩書三禮既中有得乃更博覽儒先老釋及泰西哲理凡時論所推崇證之經而心不可者初不爲人移易既得其會通則亦不復膠滯於初故雖有時辯者苦其過執然卒未嘗不心欽之其授經於弟子也亦然立談微解往往久誦而益親也既任教育司喜汲脩絜方聞之士居恒愛讀離騷於忠憤悱惻之情動與神會又精形家言山水妙理輒目寄而心契之文詩書法皆清迴絕俗似其人作家書極鄭重其三子以蟄爲存其遺訓一册讀者玩其詞撫其手墨猶想見之焉著有毛詩講義尙書

講義離騷解詩雜文若干篇藏於家

李炯號藻山性明敏讀書有大志年甫冠爲貴學使恒所賞識拔冠童子軍光緒辛卯舉於鄉名列魁選五上春官屢薦不第以鹽知事分發直隸試課吏館屢冠其曹丁母憂回居喪三年足跡不履城市服闋後構屋於竹嶺之西偏蒔花數盆竹廿餘竿終日吟咏其中有終焉之志光復後被舉爲堯潛兩鄉自治總董堅辭不獲任事未匝月而卒炯以才名重一時生平爲文和平中正得明歸震川正軌性脫略每脫稿輒燬於火曰母令後人覆瓿也今存藻山文鈔倦遊詩草各一卷

韓之錦號魏堂幼讀書過目成誦性脫落不事生產年甫冠家

業蕩然應童子試邑令尹起鸞閱其文驚爲名作有沮之者曰此文予幼從塾師讀過起鸞信而黜之坐是屢躓場屋嗣爲貴學使恒錢學使桂森所拔歲科兩試俱冠軍中光緒辛卯副車以直州判分直隸到省數月引疾歸抵家甫三日卒之錦爲文精心結撰與汪三儂爲近每成一藝必極晝夜之長脫稿不稱意每自焚燬而人之見者每愛如拱璧正韓子所謂小慚小好大慚大好也著有書錦堂文鈔兩卷

葛天民字覺生少年挈其季弟懷民讀書會城母老多病聞母病輒携弟徒步百里歸省病已乃去歲以爲常嘗於潛陽墟遇丐者奇其狀問之粵西譚某工詩文遂解衣衣之邀至會城同

居歲餘然後資之歸譚性喜揮霍天民雖竭蹶應之無難色其友余受之卒教其遺孤妻以女母逝後將先人遺產與其積年節縮衣食所增益之田悉付季弟及次弟之孤赤手携妻子遷於鳩江之濱稅屋以居性和易訥於言詞與人無忤亦不苟同有經濟才學力尤富於詩文字三者皆擅長黃體芳張謇之倫皆目爲奇士曾充省諮議員建議不行自是不赴會遂致力於萬頃湖湖田事勞勩溢量坐是以死詩文遺稿爲青年學子軍劫殘無片紙隻字存者時論惜之

胡遠濬孫緒
郝秀觀分纂

懷寧縣志卷二十

篤行

喜怒哀樂之節莫備於禮彝倫日用之極則莫著於經要不越乎庸言庸德之常非有高遠難行之事隱恠可以驚世駭俗之爲盡人而可能者而人之爲學或汨於訓詁之支離荒於廣而不能返其約也或求諸性命之淵微究其極而不能正其趨也又其甚者泛鶩於文字之末馳騁於外而無所感發興起於其中也於是乎六經幾爲空言之教矣惟此鄉黨鄰里先正典型閭巷相傳觀感最易其溼遠者猶或式廬起敬過墓生哀其近者亦復衣冠警效接於見聞其於感人心善風俗明效大驗必

有捷於誦讀之餘者故於前志所錄復補輯而廣續之非惟旌德亦以垂型記曰行遠自邇登高自卑此尤其取則不遠者矣東漢毛義字少節廬江人家貧以孝行稱南陽張奉慕其名往候之坐定而府檄適至以義爲安陽令義捧檄而入喜動顏色奉心薄之及母亡去官行服後舉賢良公車屢徵不至奉曰往日之喜乃爲親也

劉宋何伯璵廬江人與弟幼璵俱厲節操養孤兄子及長爲婚推家業盡與之安貧枯槁誨人不倦郡守下車莫不脩謁有蔡曇智鄉里號蔡曾子伯璵兄弟鄉里號爲何展禽並爲高士沈顛所重常云聞蔡曇智之風怯夫勇鄙夫有立志聞何伯璵之

風僞夫正薄夫厚云兄弟年八十餘幼璵梁初卒

本南史孝義傳補

明曹鏞洪武時人母龍氏病氣疾醫藥弗效見本草謂人肉能療疾乃刲體肉以飲母而愈既而復作又刲胸肉以飲復愈未幾又作妻王氏亦刲臂肉飲之既而大作鏞憂甚又刲股以飲而疾乃瘳母初不知也事聞臺臣議加褒美詔旌門復其家名見明史孝義傳祀鄉賢

丁榮字宗仁成化丁未進士謙謹忠厚不事華藻居父喪哀毀踰禮苦塊三年足不入市服闋冠服猶不純采待異母弟恩勤有加泰和羅氏欽順嘗從受業焉官行人出使河南道卒祀鄉賢

方鵬字其大嘉慶丙戌進士始爲諸生時家甚貧繼母馬遇之無道有女弟馬出也曰嫁吾女必鬻其居母死卽鬻居稱貸爲嫁貲父癯病篤吐血一升跪接而吞之父歿親刻木像飲食祭焉會他出夢父有怒色趣歸視迺家僮誤簪刺其像號泣治之其孝感如此有司聞其賢周穀二十斛後仕至陝西督學僉事祀鄉賢

劉棐字君輔翰林溥子垂髫時聞父訃晝夜奔赴渡河墮水逾時而出人以爲孝感後膺歲薦

段正洪裕州學正恢之孫母葉氏卒會鄰家火將延及正洪以身蔽棺號天甚哀忽雷雨大作火隨止

程程字用憑積學勵行設教里中遠近學者前後數百人質尪弱不勝衣言訥然不出諸口坐皋比數陳精理娓娓數千言不竭也時良知之學盛行程獨守河東之教誨人專以踐履篤實爲務嘉靖中歲貢授湖廣臨武令有惠政滿三載卽乞休子敬思舉人授浙江縉雲知縣聞程引疾亦請歸養居白麟坂值歲大稔程發困積千餘石以貸次歲復稔悉召焚其券後歲稔爭擔負歸程辭弗獲卒無一負者年八十卒門人私謚曰貞靖先生請祀鄉賢

段志理學傳

子睿思字元哲諸生遇異人授以三式之

學遂精其術兼諳八門五花之法直指使巡方至皖造廬訪焉假安衛軍令將之登壇指麾坐作進退咸如法直指欲薦諸朝

睿思峻辭之父程卒廬墓三年郡守旌其門

朱正色字念默邑庠生幼志聖學以主敬爲宗生平無苟笑無惰容其昌道講學務以躬行實踐爲先嘗曰道學若無實踐徒襲皮貌雖語錄千緗終類桑門棒喝耳隱居授教一日歲晏攜館金歸塗值一鐵工夫婦相泣而哀正色問故知爲償負鬻妻也卽傾囊悉周之夫婦得完歸語其妻方氏方訢然稱善歲事蕭條莫辨兒女饑寒無介顏色子嗣哲嗣敏後亦名士

容恭字益所嘉靖間貢生宸濠變值父喪倉卒奉靈輻入山墮水中身與俱沒伏柩側數晨夕肌膚盡裂不忍釋遇救獲免後仕廣東香山知縣歷淮府審理以子若玉贈朝議大夫

魯希曾嘉靖間歲貢與弟希周菽水侍母必歌詩以侑之母疾三年衣不解帶學使欲旌之希曾泣辭曰此自生人恒事何忍以父母博名高哉學使降階揖之加敬禮焉希周以舉人任江西德安縣訓導有文名分校順天鄉試得士九人八成進士世服其鑿

皆學易性廉介有方士善黃白之術欲私相授學易却之萬歷癸酉舉於鄉絕意仕進授江西金谿知縣不之官故人爲臨川令值歲饑遺以金復載粟數十斛相餉俱不納事親至孝父教之嚴年六十猶撻之跪受惟謹父年及耄恐獨寢不暖共枕被

者八年

據前志
雜記補

王道溥弟道達幼孤母壽近期頤弟兄俱年七十孺慕不衰日
娛其親引諸孫堂前擲梨棗爲戲家三世不析箸鄉里稱孝義
焉

吳旦字子寅幼孤母督使學以歲貢任河南孟津縣教諭羣從
昆弟數十人待養於旦旦悉贄俸所入以供之妻子糲食敝衣
無一怨言數十年如一日子埜亦歲貢任南雄推官

吳本清貢生父茂病篤顛天求代父尋愈及父母相繼卒本清
廬墓時有涌泉產芝之異成化時旌後爲湖廣監利縣訓導升

王府紀善

名見明史
孝義傳序

劉應甲諸生幼時父游幕粵中賴母教成立叔父母無子病篤

應甲侍藥營葬不異其爲子也著有他山中江草豫章艾南英
亟賞其文

吳汝鼎諸生早孤傷痛嘔血兄汝忠病癱拮据致參藥餌之已
實忍饑啜糜弗顧也又雅精典故著有制勝末議諭俗小言子
過順治間歲貢博學工文詞邑令賈壯聘修縣志

高材字世篤愛異母弟妹得父懽心父卒舉橐中裝悉付異母
弟妹人以是稱之

高樞字象乙諸生孝事父母迎養寡姊嫁亡母愛婢不忍役循
循爲善於家卒後數十年故老猶指其廬曰此高先生居云
盛希夔字太音父歿哀毀踰節兄弟析產讓腴而以瘠自予子

應春字與偕年十二爲諸生穎異有文名父病嘗糞者再庶祖母年八十而憊命妻魯同起臥扶掖調護漣浣穢惡者數年嘗夜讀書有偷兒入戶視之鄰人也括囊錢與之令悔過營業終身不道姓名著世澤堂詩文三卷又社稿數百篇子自新以薦任九江府推官

吳應鑑字幼安事兄應鍾如嚴師宴居相對不敢側弁欵坐兄死至老每念及輒爲泣然

楊照諸生先世以戰功授世職照次當襲時從弟應春爲大父所篤愛思得借襲而口不忍言照微察知大父意卽忻然讓職力學迄老不倦嘗作五思箴以自警

汪培年三十喪妻子俱數齡誓不再娶經營祖父母父母及妻五喪別無親族可藉棺衾窆窆手自拮据鄉人稱其貧而能盡禮焉以子鉉贈文林郎行人司行人

戴君鼎諸生父年七十有七病廢床褥君鼎顛神乞代父夢人謂汝有孝子當延算十齡已而果然弟婦魯早孀遺孤五人長其且纔八歲耳俱賴君鼎撫成之君鼎年七十三卒乙酉兵叛妻宣守柩不去罵賊死順治間以子其員任陝西西鄉知縣受贈如例

方都韓字大方崇禎戊辰選貢居母喪盡禮乙酉兵叛蒼頭勸之出都韓以手搏膺曰豈有父在難而子逃生者乎入遇賊執

父以身代死父得免著有去兵議推稻議五捷紀勦寇十三策禮經搜義門山葢閣集等書其集唐諸詩尤稱絕調

阮之鈺字韜甫諸生乙酉城潰母崔老病不能行賊至之鈺爲母請命不許以身代死不許遂挺身障母皆被重創母仆之鈺罵賊強起格鬪不支死子湛甫九齡得脫於難順治初補諸生痛父死孝之烈哭求直指以事聞詔建坊旌表

蔣奕芝字鍾韓弟肩芝字鍾弼皆諸生乙酉城潰賊欲刃其母奕芝以身覆母屢受刃遂死母臂上賊爲色動母幸得全肩芝跟踰負母徒跣奔山中遇虎虎伏相讓奕芝子被掠肩芝破產曠歸

黃淡字元味諸生乙酉城潰母徐爲叛卒所執卒疑其家有資榜掠逼獻淡以身庇母求釋見母被刃遂奪刃抗賊賊衆擒殺噴血罵賊死兄中通中德皆諸生亦格鬥被殺

楊貴母蔣病危剖左股及脅肉令妻和粥以進疾遂愈詔旌其門

王堦字伯升以易補邑庠生年十九剖股愈母疾增

韓祥允諸生大參一光子九歲剖股愈祖母疾又剖股愈母疾同里稱其孝程昇節婦聶氏子兩次剖股愈母疾族衆感之讓吉壤與厝先人里中呼爲孝義塚巡按鄭崑貞旌其閭江東隅父文試病剖股和藥血流至地不覺也旣暈仆家衆驚視猶呢

呢作治藥聲顧創甚不能自進藥衆爲進之後父歿東隅亦以創亡

程維字廷翰宏治間國子生父母卒俱廬墓兄蚤世資產悉讓孤姪

劉鈺字志堅景泰丙子舉人授浙江紹興府通判謹厚淳實家居默坐觀書閱若無人教授生徒雖隆暑必正巾服兄鏞屢負貸於人鈺不省多寡以所入束修代償之鍾蕃守郡時鈺甥陳達以事繫獄鍾召鈺飲鈺以達故辭不赴鍾益重之因釋達在紹興嘗運餉鉅萬至湖廣既而餘耗千金鈺歸盡還之省使嘉以爲廉卒祀鄉賢子溥自有傳

危山字志岳元尙書素之後也正統甲子舉人幼警穎巖特事母能盡權居喪哀毀如禮慎交遊已然諾志高而行孤學瞻而氣充守令器之祀鄉賢子容進士

柯忠明字見安成化乙未進士江西道監察御史事親敬兄孝弟兼盡奉勅入祀孝弟祠補

雷雨字民望以諸生入太學結廬田間嗜古聚書急難賙貧見稱鄉里以子鳴春封河南參議鳴春見儒林傳

任永寬少時某甲貸數十金後還金忘予甲券甲疑永寬之匿其券也而靳弗肯言遂病永寬聞甲病馳至以券還之甲張目曰君長者吾妄疑君矣因吐一小蛇而愈任氏先世皆力田至

永寬始教子以學子憫爲諸生以儒術顯嘗應童子試父約府縣院三試皆第一否者予杖及院取誤傳第二憫自外來父卽予杖受杖畢起而對曰亦列第一其順承如此後以子可容仕永寬贈大參憫封中書舍人晉贈大參

顏恂字君實歲貢生御族黨嚴而有恩貧難者月有賙貿易者月有貸讀書者月有課子弟安業無敢務分外亂家政者著有
大易解微毛詩旁訓通鑑總斷性理註及詩賦百餘首以子素封中書舍人

江見龍父雲質行淳古教子有方見龍年十三應童子試論題爲天之曾子西銘乃天之宗子衆譁以爲誤見龍曰非誤朱註

云體其受而歸全者天之曾子也衆歎服爲諸生清介自勵嘗讀書古祠中屋材朽落會天雪甚同舍生欲取以燎見龍毅然止之萬歷甲午舉人授福建南平知縣教士子尤勵氣節未幾引疾歸無以爲裝吏持羨進見龍卻之曰不治其事敢貪其利乎年六十五卒子夢佺諸生博學善屬文早歿夢鶴自有傳
宣塋字明瞻歲貢生初無子買妾方入室見女有戚容詢之名家子召其父母還焉任滁州訓導轉甯州學正兩學之士并立
石志去思

顏從仕字修之弟從心字開之皆諸生年六十餘母疾猶躬爲浣垢兄弟自相師友其居在江濟口哦手錄寒暑不輟鄰里罕

觀其面從仕後應歲薦子渾進士浩舉人別有傳

蔣卿字雲庄嘗於除夕獲一偷兒謂之曰汝爲度歲計耳度所須幾何米鹽之類悉以與之偷感泣去一日卿醉臥塘側偷負歸叩門家人問之曰我卽除夕蒙公惠者今負公歸耳啟戶則已逸矣又一日行江岸見少年號泣欲赴水詢之則因販橘爲酒所敗貲已竭畏責逋不敢還卿索其簿記閱之計往來費悉資給焉

陳尙焯字奕南諸生家籍舊隸於軍尙焯費千金置義田給旬補不累其族

魯士龍諸生醕謹自愛嘗館於巨室盜刦主人而遺所刦於途鄰人拾之歸主人廉其跡以鄰爲盜也訟之士龍亟白主人得釋

方應徵習陰符業應武科得雋明季屢膺當事聘薦俱不就鄉里推爲善人著有披沙集

李芝奇萬歷間副貢內行純篤人號長者傳書教子淡然以終著有易經質疑數卷

張久中諸生授徒自給族黨有逋課者每捐館穀代償盜入室久中覺之謂曰汝良家子也何至此以所存修金爲贈誠令自新卒感化復成家業久中以子清議仕追贈朝議大夫祀鄉賢謝嗣恩字莫京諸生蚤失怙事母至孝博士兩舉德行於學使

者皆膺上賞從弟推恩孝友誠篤時稱爲一謝
聶廷鼎字襄宸窮老積學操履方正嘗自謂我不能留產業但有方寸地可遺子孫耳年八十無疾終

蔣延姬字孔緒諸生家貧嗜學晚益明性理有視履考門山草堂詩集

戴光祖字伯繩歲貢生任池州訓導立行純篤精於易與朱國熙章文炤稱至交國熙性孝博通經史爲名諸生文炤字中素亦貢生任六合訓導三人者皆隱君子云

胡璉諸生抱奇不偶師事阮堅之友事白瑕仲瑜相勉以仁義里有忿爭者往往得胡君一言爲曲直

汪廷侃字司直諸生飭廉隅不喜奔競鄉先達重之樂與游處著有經濟彙語

曹司秩布衣不苟於利有徽商及豫章人曾寄重貲於其家後數年始取歸爲人倚信如此

張守紳字雙峯國學生考授州同知饒於財施與不倦嘉靖間捐穀賑饑者屢矣萬歷壬辰旱蝗爲災守紳罄家穀賑之不足其姻毛氏有藏稻守紳貸以濟俗傳守紳稱貸時毛氏不允一夕毛氏所藏稻盡飛入守紳家里中名張氏倉曰飛稻倉云

曹庶立心不愧形影嘗夜拒隣婦惠偷兒錢米有長者稱子惟勳樂善好施崇禎辛巳大疫屍橫街衢傾囊資施棺槨藁席後

力不給每瘞一屍與百錢晚築擁萬樓以課子長子鶴諸生次士奇康熙壬午舉人孫四俱庠生

張世俊明末歲饑竭橐以貸鄰里後悉焚其券

莊可象崇禎辛巳歲大荒時絕糧者數日矣拾遺金於衢路守待其人還之又寡人徐從學樵者謝耀卿皆拾遺金還其人王嘉禮屢拾遺金屢舉以還左兵東下嘉禮年八十餘欲避於城途次假寐夢金神止其往遂還山免於難

清劉世廕字玉森諸生親歿廬墓乙酉城陷父柩厝郭外世廕俯伏柩旁不去賊欲刃之以守父柩告賊感而去者數四晚杜門不出課生徒多成名士子宏謨字維嘉亦長者康熙辛酉舉

人著有周易集解

方都亮字明治諸生乙酉城陷奉母避亂入山母老病不能行都亮乞竹作籃輿與兄楚昇母都亮體癯瘠雖勞不以爲憊後得疾卒

夏繼春明經蓮如子當流寇之亂祖母張爲賊所執繼春隨父奔救賊渠勒以金贖父念金無從出欲脫兒自留以殉母繼春又欲脫父賊留質繼春叱其父去次日賊移營將刃張繼春抱張項曰老人瘠我肥請以我膏爾刃賊解其抱不得遂殺繼春棄張去時張年八十後壽至九十六而終

勞永蕃生歲餘值乙酉兵亂祖母抱之逃出母曹與離生死生

未必也永蕃六七歲時知其故號痛欲絕十三歲卽誓尋母多歷都邑凡遇存贖婦女之處哀號求索杳無音耗旣而娶婦生子曰吾有子矣遂遠行且二十年一日於雲南雞足山下遇一人持畫一軸示之曰子尋母耶母不可見矣可展此畫視之則世所繪大士像也永蕃大慟而返奉大士像祀焉恨生不識母終身不茹酒肉年六十餘卒

王國楨九歲兒也父早卒母錢遭流寇離散悲號尋覓至張師墩遇母湖邊飢餓旬餘奄然一息矣國楨採菱芡食母得全寇稍平隨母又覓得其弟弟邁危疾國楨日夜祈禱尋亦護甦邑令黃旌以孝友性成

孟玥字子肇諸生兩弟俱弱齡經亂散失玥冒險入賊中詭作緯夫代賊挽舟或市酒肉勞賊探賊舟皆徧辛苦越二載獲弟於豫章歸爲之完娶焉季弟又蚤死撫嫠孤四十年得完節成立

王嗣雋字允茲左兵陷城父廷綬臥病床褥嗣雋守泣左右父叱之不去有頃賊至索金不厭鋒刃立下挺身蔽父父竟遇害嗣雋項受三刃絕面復甦衰絰終身志永痛焉

汪之濟字舟子諸生乙酉城潰抗賊負創救父難歲荒同里不能舉火者夜過其戶密周之子三義字公路亦諸生母潘年八十病肺臥床積歲未嘗一刻離母側學使臨院檄三義歲試或

勸之赴泣曰脫離母不測此恨可復贖耶母亡以毀瘠卒郡縣
爲旌其閭

孟輔世字翼子諸生父振邦母崔俱以城潰殉節每一感慟淚
盡輒繼以血年五十六卒易簣時猶以親遭慘變倉卒不能如
禮有遺憾云

王懷堯明季寇亂時年十四從母任攜兩弟避賊覓食於路得
飯則進母與弟已掇草葉以療飢季弟懷禹弱不能行母欲棄
去懷堯泣不肯負之奔竄山谷重跣流血賊追及將見殺季弟
叩頭哀泣請免兄代死賊異而兩釋之

周文典乙酉城潰母何以殉夫殲於賊文典覓殘骸溝塹間不
具號呼累晝夜每夢涕泣覺而枕衾皆溼至老不渝子偉康熙
戊子舉人

汪士元諸生父之彥病篤刲股療焉父歿停柩於室時流寇四
出土元與弟特生舁柩以奔穿度賊營躬冒矢石賊哀其義不
忍傷之

金鼎相字雲六諸生乙酉城陷母黃抗賊死鼎相終身不近刀
器誕日忌辰茹素悲哀五十年如一日子永歲貢生自有傳
任國模字士範諸生大參可容子兵亂奉母入山時母年八十
國模年亦五十母卒居喪盡禮每一望邱壟輒哀號泣下太守
李士禎重其德舉鄉飲大賓

徐世儒字文卿好善樂施因致艱窶一日戲釣河干見清淺處有敝簾數具拾之得白金數萬兩廣行周濟置高家湖縱鄉人漁釣其中自秋徂冬咸無所得世儒率家人自網則取之不竭冬月潮冰鳧雁無所食世儒布穀冰上凍解遺穀沈泥中來年夏大旱潮水淺生嘉禾刈之獲穀數千斛以賑飢者補

朱志光家不甚富好施予嘗拾遺金三十兩徬徨道左抵暮不歸見有人踉蹌而至者詢之知爲失金人還之其人曰我鬻產得五十金欲以完官事今少二十金官事終不了因泣下朱因偕其人至家出已囊足之閱日有以分拾金不均訟於官者卽某甲所遺金也甲持金還朱却之鄰里有問之者朱曰無還金

事楊楫字汝駿坦衷曠度與物無競遇拂逆相加輒曰彼未嘗有過或待之未至耳兄弟析產田地奴僕取老瘠者曰吾子既多且長稍克自立弟輩子幼非藉先業難存也以上二人見前志雜記

聶應甲諸生遇父母恙手自捧持籲神乞代執喪哀毀如禮阮士鏡字仲虛欽州知州以臨子事母孝迄老猶同嬰孺篤愛母弟士鏃一切生產不以累之悉推所有與共子涵自有傳錢有達幼孤侍母病嘗糞甘苦某嫗攜將笄女鬻以自存有達亟予數金令歸原聘王氏子子選自有傳

孫鵬字扶南康熙甲子舉人七八齡時逮事王母稱順孫焉母歿一慟幾絕懼過傷觸王母卽父悲節哀承志事繼母尤孝兄

弟友愛怡怡如也

陳德昌監生少失怙事母及寡嫂無間言嗜學好善終身不涉訟乾隆乙巳飢倡捐平糶產家渡廢建橋濟之江溢黃池圩隄潰數百丈獨力修築嘉慶丁卯以五世同堂得旌

本前志戶口

張應聘醮篤無文飾鄉里有爭者多就質焉明季漕政敝壞族罹其害爲破產援之得免郡守張茁聞其賢兩舉鄉飲不就順治己亥海寇犯皖應聘年八十七矣子令奇倉卒負之入龍山迨歿躬舂錘營葬跣足兩雪中膚裂流血見者莫不感愴焉童源年十六父諸生之鏘挈入城應童子試歸過野螺橋父騎飲水失足源奮身救父父得免源力憊沒潭中父呼救無及矣

汪華鳳家不戒於火舉室熟寐已焚至其母榻前華鳳急奔烈焰中救母出母無恙華鳳遍體創潰一日死

程士憲字仲章歲貢生姊早嫠矢節士憲竭力護持撫孤甥如己子與兄某友愛無間歿之夕猶惓惓戒諸子以善事伯父爲言

陳蔚字豹涓康熙壬午舉人讀書略曉大義能出己見翻前人窠臼豪於飲自謂得酒中趣不修邊幅廓如也平日所得館穀盡爲諸姪營嫁娶卒無以葬郡守張楷爲經紀其喪

陳循字奏言中康熙甲戌武會試授溧陽營守備兄燮早卒姪維塾甫六歲撫之成人既而維塾亦卒又撫其遺腹姪孫在銓

恩義尤篤

諸應震兄蚤卒婚嫁遺孤如子里有不相能就應震質之多解散子正達歲貢生正述拔貢生

何振纓性至孝父卒後事繼母三十餘年每侍疾衣不解帶中夜焚香求以身代嘗拯鬻妻者以金家獲偷兒出酒食食之贈以錢米偷者爲之改行又歲暮路遇赴水求自盡者問之則家有老母典衣度歲而遺其金振纓惻然如數與之知縣馬剛耳其名時江南尙未除糧里之制剛請振纓董諸里長之成代償逋賦四百餘金嘗從容問曰堂以下無非面諛我者子能規吾過乎振纓卽指其數事婉言以諍剛嘉納焉戒子孫曰顏叔子

秉燭達旦楊伯起暮夜却金讀書人必先以此二事爲法聞者以爲名言歿之日遠近無不尸祝之雍正二年邑人請祀鄉賢云曾孫文珍字凱方亦有善行能繼其遺志云

何亦高溫醇有道人也平生造次必於禮法事父以孝聞父素嚴重亦高委曲以博其歡心遠近稱之性耽書籍年老猶手一編終日吟哦弗輟也何氏故望族子弟註諸生籍者多出亦高門下每歲禮鄉里缺粟咸減其直而糶之賴以全活者甚衆迄其歿也鄰舂罷杵而泣曰長者長逝吾曹其失所依賴矣亦高爲人坦易不設城府兒童聞履音至皆歡忻如不勝者然遇浮誕士疾之如仇以是少年亦多畏憚之平生不食言亦不借爲

世俗款曲嘗語人曰吾平生無他長但不作偽耳汪氏德鉞爲之傳稱爲隱君子私諡曰孝純

四一居士
文鈔補

濮閔中年九歲母陳患目將盲舐之數日復明後又病腹脹醫曰得絲瓜汁入藥可愈時值寒冬閔中號泣求覓不得忽於家藏瓜種中得一枝如新摘者急取汁奉母疾頓痊父向達病篤延醫無效聞舒城任姓者良醫也徒步往返一晝夜二百餘里求藥救父及抵家兩足盡腫母與父先後歿俱廬墓三年種樹墓旁彌望葱鬱土人名之曰孝子林乾隆四十六年旌葬小且記嶺

朱復初父病臥床褥眠食與共無旦夕離後其父齒落僅存一

二噉物甚艱復初嚼而奉之又氣弱不能嗽痰以口相接爲吸而引之

丁昌禧字祥履國子生父病刲股療之延數月而歿昌禧痛良醫之莫遇因壹志學醫鄉鄰召視疾者稟母命迺往遇甚兩大雪雖夜中必歸未嘗一日離母側母年老以無疾而終

甘印符父歿方盛暑屍穢出棺印符跪而舐之廬墓荒山中鬼物侵之不爲動叔父某篤老無子而病牀蓐水漿倚印符爲命自謂勝有子者印符後客江西不知所終

江本宗父聖權早歿事母趙每食跪進甘旨疾則刲股和藥以進母歿廬於墓左麻衣草屨日夜不釋髮亦三年未薙時束以

藍布間出業販布物籠中不忍雜以紅紫終喪未久而卒嘉慶七年旌

方家政諸生父嗣益乾隆庚午舉人母歿哀毀成疾卒家政與弟家乘並以貧授徒省塾中茗果歸以遺母遇四時嘉味必拮据求得歡顏進奉使母不知其艱母病痰嗽須每日雞鳴進藥兄與弟旦就塾暮歸室遞代扶掖寒暑無間者十七年後母及弟相繼歿一日火延其屋舉家惶迫家政跪而禱曰生苟不德焚予一屋而止俄卽反風火亦隨滅

陳生棟本姓許甫二歲父母早亡陳氏姨繼爲己子生棟性純摯幼時親隣或飼果餅必留歸以獻姨患怔忡聞人聲輒悸生

棟處室無敢咳嗽步履亦不聞聲嘗從陳渡銅陵江風濤大作陳老而病足度不免亟呼生棟游涌逃命生棟泣曰焉有瀕危而棄親求活者耶負陳出舟距岸數丈連躍而登俄頃舟沒後陳生子命許歸宗生棟泣不肯請俟二老天年陳夫婦歿居喪盡禮又爲本生父母追服三年喪布素終身嘉慶十二年旌郝正纁兄年五十無子欲以正纁次子爲之子正纁勸之置妾兄嫂俱不欲迺陰買張氏女納之數年又爲納方氏女生一子朝中未幾兄嫂俱歿撫朝中猶己子治家公正子姓八十餘口四代同爨不析居鄉里稱之

潘值字起秀國學生叔母熊年十九守節嗣值爲子值善事之

如所生弟某夙負數千金將死妻問以家事曰有兄在勿憂也
值果竭蹶數年爲盡償其逋欠撫養諸孤姪咸克成立

李道湖字思獻少孤力農事母何每冬寒母易衣服必身自取
溫以進夜則先臥溫被抱母足眠母疾三刲股療焉里人稱其
孝

阮世恩字聿修兄病嘗藥血疏遍禱期以身代兄愈而已竟歿
聞者傷之

程璋字金普諸生幼時父督教之嚴閉一室讀書久之性益修
謹母黃病膝疽展轉牀蓐璋晝夜不離母側便溺輒與持掖間
負行游室中數年而母乃歿生平不解欺人與人語迂拙可愛

人亦不忍欺之

江本立字道生諸生性坦率與人渾渾無圭角而內行甚篤母
年老本立亦幾五十偶母不懌卽與妻長跪請杖女弟嫁潛山
徐氏母愛之甚家有田百畝本立分其半與之遇人自言貧困
輒給金錢助焉往往爲黠者所給

王惟高父早歿母改嫁某氏數年而某亦死子幼家貧無所倚
賴惟高稍長爲人傭願迎母歸不可則傭於母之同里得朝夕
近母取傭值佐母饗焉母死旣葬傭如故月往拜墓下終其身
陳世德字心齋母病疽醫不能療吮之數日而差年四十喪妻
不再娶晝自炊爨夜視衾被依依母側者十餘年母歿哀毀逾

禮

盛應魁年十二母危病三刲股煎湯以進詔建坊旌表葉正奕母劉病篤刲股肉烹進尋愈後任長治縣丞王言諸生嘗刲左股愈母疾及父病篤復刲右股以進蔡世衡字白度諸生刲股療母疾獲再甦及伯父母病又刲股療焉子大定字匡直亦刲股療伯父病俱爲有司所旌劉掄才國子生年十四母黃病劇醫治罔效掄才禱於神刲股和藥以進母疾得愈江守邠父世富病篤刲股療之而愈及再病又刲股如初父獲延算十餘年詹先易兩次刲股以救母丁世昌陳錦武陳培俱刲股救母疾陳光烈刲股救父父歿廬墓三年彭玉明幼失父母爲伯母黃

所養黃疾篤玉明斷指和羹以療黃疾得愈

劉前彬諸生父母喪俱廬墓三年建陟望臺永思樓祀奠焉楊恒先業貿易居皖之北郭奉母以孝聞母卒廬於墓側晝夜悲號路人爲之感動苦塊二年哀毀成疾卒邑令劉效曾旌以鄉黨稱孝之額江瑜字金玉業農父歿權厝荒野隻身往宿鬼祟臥旁略不驚怖偶他出亦中夜必歸寒暑風雨無間及母歿復廬墓三年郡守溫必聯給門額以旌何鑽先廬父母墓於曠野中三年蛇虎常至不驚避徐芳遠少孤事母盡孝母歿廬墓三年李進茂字令昭諸生有文名父病痔癰同弟殿揚日遞吮之父歿廬墓三年劉鳳麟幼喪父傭工養母母病篤刲股和粥以

進母歿廬墓三年嘉慶三年旌朱世伍事親以孝母歿葬夫子岡廬墓三年父歿停柩在堂三年不入內室後葬父猫兒山又廬墓如其母蘇大本字茂章父病痰厥三年不省人事大本時饑飽煖寒揣己意爲之調節父歿浮厝於龍山之麓築廬守柩三年一夕風雨大至蛟水陡發谿谷漲漫雷轉厓崩大本抱棺號慟誓死不離俄而亂流衝盪旁決小港他徙同厝者棺多漂沒大本父柩獨無恙又冬夜大雪凍折巨樹一株斜覆廬上而不壓亦孝心所感也

胥宏祖字寅谷爲諸生有名貴池吳應箕次尾宣城胥質無疑交譽之延入復社宏祖辭不可謂必有鉤黨之禍未幾果然福

王南渡馬士英阮大鍼柄用濫以名器假人大鍼母宏祖姑也一日往省大鍼留之邸欲官以同知府事宏祖辭亟引去宏祖性孝友六齡繼母王撻之無完膚幾絕婢奔告其父父大憾宏祖曰母撻兒教兒也家人聞之盡流涕父卒執喪盡禮讓產及其弟鄉里匱乏有婚喪必助之宏祖於學博綜經史旁及醫藥卜算之書老而愛釋典年七十八卒秀水朱氏彝尊爲誌其墓妻阮乙酉兵叛遇賊以刃脅之不從身被重創猶罵賊幸不死亦年至七十子蔚林茹穎別有傳

江同海字觀卿廣信同知夢鶴子讀書穎異爲文法先正大家順治辛丑進士以候選歸里杜門謝客手不釋卷藿鹽風味泊

然無改嘗布衣草笠乘蹇驢行郊外父老指嘆謂吾見其三世如此矣後選湖廣襄陽知縣病不能赴卒

江一傑字迪元訓導之鯤子六歲失恃長入里塾誦經書皆曉大義誠樸敦厚輕財好施年八十九歲無疾卒子世貢字禹式諸生積學有文與族兄同洪同海齊名三君所著文集鈔有思齊錄初不識別名字樸茂渾古如一家言

任氏兄弟五人諸生之焯子竣塾見宦業傳堦垣堡皆諸生堦字德音性簡淡不慕榮利凡利人濟物之事殫力爲之著逸園方書行世垣字濯公年十二城潰被擄有江右賈客黃德明見之贖歸後德明舟覆全家流寓儀徵垣訪得之卽具舟楫迎至

院分屋與居生養死葬無缺焉平日尤篤友誼二黨姻親待以舉火者甚衆子奕銓歲貢生力學植行士林推重堡字雉萬父母旣卒晚年營葬苴經廬墓三月匍匐霜雪中號泣不能起事諸兄恭謹白首無間言

張麟字彥叔歲貢生倡捐米穀行社倉法於其鄉註太上感應篇行世子維嶽字宗五廩貢博洽有文郡守張楷聘修郡志補遺註闕搜討之力爲多

徐可輝性好施與有游姓者欠漁課被繫將質其子可輝與金償納父子得全又王姓貸銀三百兩不能償以原券還之曰無令余子孫執爲口實

濮世珂字我榮諸生歲饑出麥米賑貸鄉里有羅姓者將鬻妻償官課世珂捐金代納俾完聚如初

許維藩諸生兩親好義喜周濟維藩承志不懈有鄰某貧甚鬻身者婦將自盡急出金爲贖歸焉

劉一魁父繼芳年八十歿一魁歲時思親至耄耄必垂涕子光祖好善如其父全嫁娶助棺槨賑救貧乏前後焚券約免二千餘金一魁壽八十七薦列鄉飲大賓又親見其子以耆德與賓筵尤六皖所少云子澡歲貢生沅拔貢生

潘介字幼石歲貢生方侍郎苞稱其文行重江表而尤篤於故舊趣舍與衆異趨嘗客游京師閉一室不與諸公貴人接廬江

孫起山維祺才高而得狂名顧心屈於介求一見不可得因傲居迫介舍伺之半載始獲接談遂爾相締結晚館於宋學士衡家學士子相繼夭亡遺一幼孫疾將歿握介手曰生死交情兩世一孫以屬君矣因相對痛哭時介年已七十餘留學士家數年獨任撫教之責有以他事請者則託以老病辭著作甚富雅不欲以文辭自見或請出其藏稿行世弗之許今存者序記論說雜文十數篇

蔣謨字燕士諸生少豪宕不肯屈首里塾挾策遊於四方同邑胥蔚林令會稽招至署客有用事者不當意避居僧寺郡守俞公聞其名僞遣人若請事者餌以多金謨正色謝之後胥以虧

帑挂議客多散去謨獨銳力營救白於郡守郡守以前事重謨爲申請如指晚居皖口杜門不出時過從漁樵之舍爭競者咸取質焉子派長字雲錫性好施予嘗出粟平糶遇貧窶授意主者佯誤浮其數與之不欲以爲名後謨以孫雍植仕贈中書舍人派長亦贈如其官

翁壯猷字維彝少穎異就塾讀書如夙記體趨捷有力便弓馬甫冠偶應武童試輒售父弗之善也疾革執壯猷手曰吾讀書一生而阨於遇謂汝長且賢可繼志釋憾而今已矣因大感慟首觸地絕而復蘇卽苦次攤書讀且讀且泣服闋陳情學使者願仍就文試使者嘉其志許之旋爲邑諸生聲譽大起繼母楊

暑月疽生於胸與弟大猷遞吮瘀穢遂以漸差初大父以壯猷冢孫故別授產可千金盡推以均諸弟自取其薄者教子弟以務實踐或聞其與朋儕戲謔輒拂然曰此非厚福基也年七十三卒子立本立準別有傳大猷字際雲知縣王鳴舉大猷及徐處士奕鏞爲鄉飲大賓號西門二處士子立行立功事繼母盡孝時有翁氏世孝繼母之稱弟立善與前母兄友愛備至棄舉子業遊幕以養親性耿介不苟桐城令涂某嘗贈以美婢辭不受有某生者貧不能續娶卽勸嫁之稱盛德焉

程性善字孟言縣學生因葬親失所遂自怨艾立簿記爲功過格每日言行雖細必書積久不懈卜地改扞轉禍爲福尤喜輯

刻勸善諸書捐置義山以瘞暴露棺骸購洲地若干畝以作經費修治道路所造橋大小三十有六爲善之心老而彌篤乾隆癸巳年八十有六無疾而終

蕭如穎字準人善屬文嘗見賞於學使姚三辰父士瑛建平學博性好施穎能承志里人貧不能娶輒以貲貸之鄰有竊人穀者事露窘甚則爲償賠得以寢息其人卒自新生平類多隱德

子濬雍正己酉舉人

補

蕭如尊字達夫性渾厚居恒惟閉戶讀書痛母早喪事父不忍刻離敬兄備至與人無僭行其家訓然也以雍正己酉拔貢入監大司成器之思親乞假歸里不仕著有梅菴文集

補

江汝湛字露燕好施與不自言德每歲晚天雨雪早起望鄰屋不舉火者遣童負囊米叩人門戶呼之出界以升斗父老至今道之子嘉椿字九霞幼隨父居井田坂山僻多虎害父每出耕輒持竹響夾敲擊繞田叫呼以助稍長從外塾歸見父獨耕泣曰父任其勞子享其逸安焉已乎於是請代父耕而翼兩弟嘉械嘉觀遠從師讀凡米鹽膏火肩送步輸十數年風雨無間既兩弟並補諸生時月告教諸子必指架上書語曰吾貽若曹惟此而已居恒行檢自勵與人接誠一不欺晚年財有贏舉以貧人其貧不能償卽置之不問頑子或藉以相誑亦慨不與校恬如也汝湛以孫濬源仕勲贈奉直大夫晉贈朝議大夫嘉椿以

子誥贈奉直大夫晉贈朝議大夫

徐元煥字允文諸生剛介不阿同里素敬憚之鄰有以子女致訟者兩造執詞不下官問里中公正者誰也衆舉元煥元煥至一言釋之衆皆服官起立謂曰君長者可謂盛德感人矣子奕鋪處士之儁也孫世峯歲貢生世錦進士世銘舉人

宣佐字左人諸生初與方侍郎苞相識幾三十年而不相知也後數與語異之因至其家見龍山山水之勝約匝歲定居焉適方以南山集牽連被逮佐在金陵奔走急難無異於骨肉兄弟方自以非所望而益嘆佐之賢及方繫刑部佐復入視問何以來則他無所爲將歸謂方曰吾附人舟車不自由以天之道子

無恙尋當歸吾終待子龍山之陽矣方出獄而佐死爲作哀辭王國運字二周諸生子度字達文章字裕斐父子並習爲善事自其家祠古墓田皆所捐置鄉之津梁亭舍建造有名者數十所凡縣人有爲義舉王氏率首倡焉歲飢出米穀以食人冬施絮衣被以濟寒苦療病以醫藥瘞死以棺槨子孫世世奉行不怠故鄉里至今翕然稱王氏善門也

魯元英歲飢出困粟贍其鄰族又散給社穀數百石獨力完納不責同里償服兄某遠遷黃梅家傾覆僅遺一子元英躬往尋歸分宅授田俾婚娶成立焉

楊之俸嘗鬻米夜泊山鎮適鎮被火延燒數十家男婦啼號之

俸爲出米三百石以賑鎮人至今德之他拯急恤貧多此類
江嘉相字朝佐國學生年十四父卒卽能獨支門戶事母曲盡
孝養遇親族急銳身任難不憚破產助之鄉有爭角侃然面折
其是非雖強禦不爲屈也延師教子禮意勤到每三數日輒載
肴酒白衣冠召鄰曲從師飲極懽而罷月以爲常江鎮王氏子
幼瞽無依爲資給其衣囊俾習星命之學終賴存活

江嘉賓字序賢諸生內行淳篤與人一出於坦白鄉里以爲眞
長者環嘉賓宅數十里凡口舌爭競率就質於門得處置一言
行路爲之歎服晚年一至京師見諸貴人科既會飲雜坐諧謔
退而歎曰諸君子放達爲賢非所以誘後進矣因謝不與通年

七十餘卒弟軸輪輪一皆諸生積學有文名

宣定字學淡由諸生援例入貢家多藏書有樓曰萬卷樓好事
者日就問焉晚耽吟詠著有草堂詩集鄰人錢某將歿託孤於
定定爲經理家務尤能不愧始終云

陳鳳鳴字用儀乾隆丙辰舉人力學以程朱爲宗每講四子書
雖盛暑必衣冠一堂二十餘人皆盛服遇家忌哀至則哭常盡
日不出戶限不見人晚得心疾少閒猶與人娓娓談儀禮不倦
年七十餘卒

楊楫歲貢生父病日數年每晨以舌舐之無間兄弟五人共爨
六十年不析居後任繁昌教諭

李核字佩涇貢生父早歿事母能致孝養母卒廬墓三年教子弟專習勞苦自兒時出就外傅日督令擔負什物往來里塾以爲常

劉通字師孔歲貢生務學尙質行閨門齊肅而遇人和謹未嘗疾言遽色築館於宅後湖畔教生徒不專尙文藝做蘇湖經義治事二齋條例隨材質高下者而作成之同時望江曹京亦依禮法自檢束每過通相對移日獨心敬憚通退而語人未嘗不自以爲不及也

唐澤沛字觀懷家貧訓蒙自給父母篤老妹二贅夫於家甥男女六七人旁無恃賴獨煦濡相救以爲活年幾五十補諸生性

顯篤嗜古雜纂傳記格言附以己說爲目一十二篇

汪履中字文俊諸生嗜學不倦課生徒功至嚴密顧口訥於辨每講肄案置書百卷雜引跡之以申其說歿數十年學者至今思之

徐言遠字帶存諸生文行爲時宗仰里中薰其德者不言之化比於溫伯雪子使人意消云大約清初至乾隆中年懷士子醜質謹懃敦飭學行不汲汲於功利貧者授徒自給非應試足跡不履城市稍豫外事卽惴惴於鄉里之有非笑漸摩久之以成習尙於虛懿哉自後生視之則遂邈爲古人矣

王鴻恩字鳳馳幼工詩賦兼嫻騎射偶應童子試不售去而就

武爲武生願以文自負觀風月課輒高等出入諸生曹督學朱公筠按院鴻恩入試詩古走筆數千言書未就而卷幅已盡督學奇其文更給一卷續成之因拔置第一將令改試以文會丁母艱不果鴻恩事母孝母疾刲股肉以進某婦新寡家人利其改嫁既遣行鴻恩聞之亟呼艇追及願償娶者金還婦養之終身嗣卹親友尤篤嘗面質人過失人多憚服無有怨之者

翁立本字拙菴乾隆乙酉拔貢就布政司理問職需次京師二十餘年爲人方直有氣傲居古廟饋粥朝夕弗給未嘗一躡貴人之門獨梁文定國治賢之留館於家嘗衆中贊稱其姓名呼爲老友素精醫諸貴人稍來就診處方畢私授俗工易置可否

立本大憾曰母再溷我我固不處方也因與諸貴人絕遊益困既老歸里里中少年率習熟軟媚憚立本語戇直望見輒避去時與諸老人會食相見無敢闌語懼卒卒發其言年八十餘竟以老且窮閉門死

潘金字獻章國學生內行醇篤尤究心葬法擇風水藏聚之所廣啟塋壙節去浮土沙礫取漚青汁和石子灰土堅築下穿隧竇洩陰流滲溼旁甃磚石覆上如橋納棺其中以窆凡辟除水蟻之法靡不備具費數千金弗恤也族有無主墳數百塚封土立石捐費歲爲祭掃資姻鄰貧不克葬輒給金錢助之路見暴棺朽骨及義塚頽敗不修者爲收瘞培築如法鄰某作屋下有

古塚金閨之惻然卽償費令毀屋修復其塚他所爲拯災恤貧諸善行稱是有屠牛溺女及勿戕古墳等說嘗舉以勸戒鄉人於俚俗多裨益云

陳梁字書崖國學生質直嗜義乾隆乙巳歲大饑梁同弟清玉買米平糶並以鹽水煮豆日一鍾食飢者活人無數家人化其忠厚子文哲諸生姪道基乾隆癸卯舉人皆能率義方之教焉黃昌貞年二十娶妻生子大璋甫晬而妻歿或以再娶勸曰有子足矣終不娶嘗載米鬻樅鎮行戶算值誤多予七十金歸解橐知之亟持還以多金償客子大璋亦善士有從父兄弟三人寡甚賴衣食之以存並予之資本習貿易焉族婦劉苦節日貸

米卹其孤又何姓貧不能娶給青錢七十貫助之乾隆乙巳歲大祲出穀米數百石賑救鄉鄰所全活者甚衆

楊全量字茹舫國學生父及叔皆前歿甫冠獨持家勸諸弟以學長而好義凡縣中工作賑貸及恤嫠育嬰諸善政官屬董其事全量不避勞瘁或更破產資之又善醫多置藥以救貧病有餽謝之者則笑卻曰我自樂此汝不欲予爲耶年六十卒其弔者與哭者識與不識哀感涕泣自詣喪主言姓名焉

楊城字重連諸生父時泰蚤卒事祖父母如禮母方患心疾禱神乞代病以脫然姊適桐城胡某而寡有甥孤幼族人利其貲產奪而賣之城攜姊及甥歸授田宅教甥成立補諸生遇族里

貧乏輒齎米存問日待舉火者十餘家

王國枚鄰某有鬻妻償負者力阻之爲代還金五十俾復完聚歲時給米穀恤其家

趙璧字一亭國學生性敦篤教家有矩範若使其子弟循謹內外秩然兄早卒遺孤者四俱僅數齡璧親教讀俾得成立長次各補諸生有張姓者貧而鬻妻妻泣不欲去璧聞之召其夫曰事可已獨吾力薄奈何亟措白金三十兩與之婦婦宣氏姑老子幼貧無以爲生璧每月助以千文又爲告之同人共輸舉本錢六十千資給薪水婦得完節

陳璇字亞斗諸生少勵志於學隆冬久雪斷炊鄰人或餽以米不受璇每雞鳴而起聚生徒講肄亶亶不倦數十年如一日家貧有田數畝分畀兩昆獨資館穀以養親年七十餘恩賜副貢潘傳元字玉相舉止依於禮法家貧爲童子師每旦晚講書作字畢諭以孝謹廉讓之道隨事開譬辭意愷切孩孺爲端聽改容朋友有急自忘其身之貧賤而爲之謀雖重受其累不悔也狷介不苟於財嘗自京旋里抵清江囊資罄矣獨爲人郵寄數十金或謂其暫假以濟傳元持不可賃質衣物復命其子往返千數百里贖歸

陳廉潔字錦堂諸生性端介自授徒外不入一錢非歲科試不履城市乾隆五十一年大疫母染疫廉潔與婦湔浣厠踰無一

息離側中夜禱司命願以身代母迄獲痊兄弟之間怡怡如也
與人言一依於忠恕里中化之雖至不肖亦皆以陳君爲長者
也邑令沈南春及吳江周鶴立聞其名願一見焉不可得時周
爲蒙城令將延其子署中廉潔獨不欲謂子曰汝年少學未成
而奔走聲氣耶吾恐的然日亡不遠矣二公聞而避之爲太息
累日焉

馬忠輝字蘊齋貢生少孤貧無所依能自卓立性嗜墳籍每念
先世楹書手澤兢兢弗敢失墜中年家道漸裕弄蓄大富一時
志學之士得縱觀覽尤崇禮師儒訓示子孫以正學敦行爲務
名其堂曰世厚額其別墅曰求放心又置破愚書屋一區於鵬

兒塘上治射圃其中詩書弓矢皆肄業所及忠輝少時嘗爲人
所輕益刻勵奮發至是極意振拔單微滋培寒峻睦姻任卹無
微不至釜鍾出入之惠里黨賴之子孝達字特亭喜吟詠捐賑
平糶歲終餽貧至於稱貸以益有父風焉守愚自有傳

丁芬桂字元宰歲貢生爲人重密不泄始家貧授徒所入修金
昆弟子姪數十人仰給焉晚略饒裕以產授諸弟而獨任其債
怡如也季弟恩蚤卒婦江矢節江父母老且貧爲迎養於家諸
生某以貧死芬桂任殯葬又贍其妻子子稍長授之書且爲之
娶婦今抱孫焉諸善事類此芬桂教生徒每謂古聖賢小心爲
本人但逐處細心自能寡過學問不患不成著有述軒文集

王大觀字成華諸生事父母盡誠終身不道人短輕薄者相戲
謔試與語輒笑不答或更以他辭亂之年五十餘歿

曹永泰字朗若諸生幼孤逮事大母暨母喪葬盡禮待弟友愛
無間一門化爲循謹晚嗜讀書鄰里罕見其面有忿爭者得永
泰一言立解雖自負理直莫不甘爲屈焉

丁志偉字龍潭諸生性伉爽無畝馘之行弱冠授徒里舍資修
俸以養親客河南館於汜水姜氏有張生思恭者父業末藝偶
過塾聞書聲而泣詢之則其子可讀書而力不給也志偉惻然
引張氏兄弟教焉并助之衣履膏火數年張登賢書弟亦補諸
生歸里後老而貧仍訓徒自給其弟子多宦達寓書通問未嘗

一語及其私

曹本字成華諸生少攻苦嗜學性篤謹善事父母恂恂門內之
行無以異於恒人父母樂之族里知者至今稱以爲孝

勞崇勳字讓泉嘉慶辛酉舉人謹愿力學坐一室日構文肆書
自程寒暑弗輟也生平未嘗妄語或偶涉諧謔旋輒吐誠自齟
齟質性文弱人反譽以恢張有才則大喜授徒京師所得修俸
以給弟旋費常不足徒步敝衣自耐瘁苦補官學教習期滿揀
發東河以知縣用貧不能賃車分墾督工日奔走數十里巡撫
姚公祖同見而嘉之命有司別付勞令車馬在工次數月而卒
鄭隆萬性耐事族某田濱河歲被水害乘暴漲決泥沙壅隆萬

田積爲廢壤隆萬戒勿與校嘗策一衛出奴擔行李隨隆萬念奴憊屢讓奴騎而代之擔見者以爲笑江殿一善醫召視疾者踵門不問貧富立至自製藥療人病不取人一錢王顯傳字超羣與弟遵典相競爲善族有因漕事被困者銳以身代不辭難歲大疫自貸錢鬻棺槨爲鄉里葬死者詹大受字抒懷國子生聞人有爭訟如己身受必求所以解之然後已沈允升字晉明敦質行嘗面責人過人憚其直家無儋石積貸者至其門自忍飢以予之劉萬象嗜善好成人美里有以婿貧將改嫁其女者萬象爲贖金完娶助之生理鄉人閒屬以公事督匠作與同寢處不憚勞瘁鮑長信字賓字國子生性好善多爲族人葬無主

墳其貧不能娶者給金錢助之又屢救江上溺人資之衣食以去查永鍾字拾補武生好賙恤貧苦歲暮日袖錢於路以與人

之數子者家不甚饒裕然皆好行其德爲同里所稱郝本蔭字用周家貧以教讀爲業修俸分潤諸弟不蓄私財母病痿痺十餘年與其妻日負之出入相代也處鄉里篤謹晚以書史自娛杜門不出

何烈諸生教子弟有法遇親族有恩姊嫁汪氏而貧爲置田數石以養烈年二十餘日簿記功過自糾責至老不衰

孫裕剛字芳億諸生敦勵行檢與人狎居一室雖日數十見必爲之起立正容家有粟糶與貧者價減而量贏數十年不變也

某歲有湖鴨百萬唼民田稻幾盡獨不近裕剛田又裕剛每出遊遇雉兔在前馴擾不去嘗山行小憩石上有獵者逐兔兔奔裕剛所裕剛褰衣籠之兔遂伏其兩腓問獵者至問曰適有一兔翁見其去向乎裕剛曰未見也獵者既去裕剛以手拂兔者三曰畜生今可去矣兔乃脫

丁配士至性過人幼時以孝友聞家苦貧不能自給傭工養父母有餘輒分給兄弟節嗇精力致貲產千金撫舅氏劉遺孤勞瘁備至後劉亦饒裕終其身無德色

黃在中武生拾遺金五十金訪其人還之教授莊名弼出示學門旌其義

張清誼宅心忠厚族有貧不能婚及子弟無膏火者解囊助之亦嘗拾遺金訪還其人

楊美之業貿易遇一客同宿旅店客倉卒遺金數百美之留住十餘日俟客復至還之子一坤父病禱神乞代夢神告之延父算既而良然

江高軒家貧操舟爲業偶夜泊遇風有鄰舟將壞挈金二桶誤置高軒舟上甫曉各解纜去高軒適見金回船數十里復抵故岸俟亡金者果有人沿江號泣呼問狀立與之其人大感願分半以謝不受江顯擢亦業操舟嘗泊金山墩鄰船少年有醉歸遺其囊金者寤而謂金遺於市將與市主人訟顯擢出金與之

並白其遺金狀少年大慚分以金亦不受也

黃列三住高河埠一日過錢肆肆主人置十金於几誤墮地板隙中主人將責僮僮走訊黃黃謝誤取明日如數還金後雖至肆終不入主人室主人以其內自愧也未幾地板壞啟之則十金儼然在焉始大感歎知黃實不取金

路麟字越軻遇歲歉好以衣穀賑人康熙辛卯赴武鄉試舟次蕪湖聞母子哭甚哀詢知爲鬻女償債者捐白金五十贖之遂以是科獲雋築逸圃山房課子讀書不樂仕進

孫鵬字旣長諸生專意教授所得館穀分潤弟姪孤嫠賴之全活

王詠元性侃直好義里有訟者每置酒延至雜坐酬答徐爲之解勸多感其言以釋

鄭成訓國子生性慨慷好施乾隆己卯大饑遇鄉里貧乏者竭力資助並自貸社穀數百石以濟之

以上前志江爾維分纂

孝丐吳配彩其初不丐也因父歿哀毀失明母年七十餘貧極無以爲養乃以炷香赴塋哭奠雖烈風甚雨不輟數十年如一日人皆知其孝每乞必倍與之不肯以常丐相待

前志雜記

王大本字挹槐道光四年壽百有四歲恩予從九品素性急公每謂人生無益於世死無補於後者非丈夫也所居鄉苦水患倡築廣泰圩至享其利者萬家嘉慶二年飛蝗蔽野捐金收捕

得殲道光二年復萌率衆撲滅之知縣朱士達以大椿衍慶額其堂束錦遺焉居平與人接嬉笑溫和若可狎玩及至排紛難決是非明目張膽不少假借鄉人憚服以王烈魯仲連方之子崧字愚村庠生敦行積學真率無所欺飾厚命字問樵性耿介好義家貧急人如己有幹濟才見事明決道光辛卯後廣泰圩連毀於水厚命相地勢召集鄉人謂宜先修張家橋事半功倍於是僉就移築有藉生訟者厚命挺身力爭閱兩寒暑案定在檔辛丑冬巡撫程懋采患皖治東數被漂沒求水利於所屬郡縣以前牘上撫憲韙之屬受事焉時厚命已逝遂別訪雋艾賦材集役享其利者至今念之席豐字晴圃諸生工篆隸道光丁

酉應鄉試房官謝莢以第一人薦主司抑之自是遂專意於詩古文辭七十二歲時患膈症數月忽夢寐中若有人焚香於室觸其氣嘔出一蟲長尺餘疾竟愈人以爲隱德所感又十二年而卒著有離騷音釋養性堂文稿種松山館詩草

潘道森字蔭槐歲貢生敦孝友岸然有道氣一時敦品積學之士半出其門弟道基字汲泉亦歲貢生學行有乃兄之風

馬祖德字述齋幼慧勤學屬文必己出未冠試經古學使嘉獎首拔之嘉慶戊辰鄉闈同考官何映松得祖德卷擊節歎賞薦於主司以額滿見遺映松意甚怦怦後庚午映松復調簾先期遣人投以書祖德不啟視原封還之映松益相推重祖德善藻

鑑嘗爲婺源令評試卷首選爲俞誦芬旋捷南宮有名於時尤喜培振寒素邑人張曾傳嗜讀書貧乏不能自給祖德出粟布濟其家親爲講授道光壬辰舉於鄉乙酉修葺邑志祖德與采訪凡有關於風化者尤悉心甄錄平生捐糶焚券諸善舉蓋不勝屈指云

楊全基字肇封增貢生孝友任卹本乎天性教人以嚴每講四子書雖盛暑必著衣五十餘年不倦凡人有美質而力不贍者給以廩餼親加訓誨成就者甚衆子名超字萬師優廩生就職訓導道光辛卯壬辰大水知府劉韻珂賑務盡善名超實與其事又委辦三橋洋徐兩保堤閘籌捐鉅萬實心經理三易寒暑

人賴其利歷署英山山陽縣訓導教士有法名超子誼蕃諸生治家有範內外整肅善歧黃堪輿之術延醫者無寒暑盡夜立赴之餽謝皆無所受誼菁亦諸生孝友性成母歿悲慟幾絕大朋字里千全基之弟也諸生六歲失怙事兄如嚴父才具開展家祠墓田皆所措置鄰里貧乏歲時資給紛難者恒得一言以解子名昌有父風誼敦者亦諸生以孝友稱於昆弟家貧而束修之入猶分潤焉

查永鉉字雍甫貢生道光元年舉孝廉方正四歲而孤少長見父手澤輒悲哀不已事重慈至孝生平無所嗜好惟篤學不倦喜獎掖後進樂施與族戚中貧甚者悉任其婚姻喪葬乾隆丙

午歲饑設兩益堂散藥施棺有裨甚鉅

舒翺字雲衢庠生事繼母張至孝張亦愛逾己出撫兩幼弟及妹極友愛人莫識其異母也妹早寡守義翺爲置產資其喪葬撫遺孤無空乏焉兩弟皆補諸生教之不專尙文藝務以踐履爲先里中善舉無不實力襄事初父與鄉先輩董理體仁局翺捐闕口田種四石有奇以繼志歲荒每解囊助賑

程麟德字仁趾慨慷好義族姓貧不能葬者悉助之至百數十塚道光辛丑歲飢捐布千緡全活甚衆濱江舊有救生局歲久傾圮麟德獨出貲重建壯於舊觀

汪時中字庸亭孝友天成撫孤姪及孫再世皆如己出割腴田分潤同堂歷代祖墓均置祭田設家塾二以教子姪里黨待舉火者數十家道光辛卯後迭遇奇災乞者日數百在門周之無惡色屢爲人完婚贖婦有某紳卒負官金數百三代皆浮棺暴露時中撫其幼孤代輸金而任葬事里人有強侵其溝洫者讓之不校鄰某家患鬼祟巫治罔效乞時中爲文驅之患遂絕生平宅心忠恕事事返己書集先賢庸德庸言置座右命曰慥慥篇子椿字長森諸生篤於倫類宗族鄉黨無間言父病侍湯藥不解衣者三月叔父病侍亦如之居喪三年不入內每忌日哀號奠醊觀者惻然

汪鳴歧字采其道光壬午舉人性至孝家貧課徒自給父不羈

用常失節鳴歧必設法供給偶有負欠必屬其所負者曰取於我勿向吾父覩縷也嘗遠館值父生辰雪深三尺父不懌曰兒不克歸祝矣言未已鳴歧至父患疽鳴歧親奉湯沐衣不解者月餘愈乃已父卒水漿不入者數日三年未嘗見齒乙未挑選二等授安東縣訓導母老不能迎養在任五年請終養仍以課徒資事畜晨夕在側身有疾諱不言必俟母就寢而後退年七十鄉人將具儀爲祝鳴歧曰老母在堂子可爲壽乎力拒之逾年以懸疣潰先母卒鳴歧窘時有納粟得知縣者行試事聘鳴歧閱卷縣人有啖以重利求首拔者鳴歧斥不與通其操守廉潔類如此著有五經管言兵燹散失僅存易三卷詩三卷書一

卷十論惜之

馬光志字道存父歿千里奔喪星夜遄行嘗春月母病醫曰得生藕可愈光志泣向舍旁池塘乞靈竟得鮮藕食之果效母歿廬墓三年奉勅旌表

王瀚字湘濤廩貢生歷署廬州太平二府教授樂善好施其鄉素苦水患捐累千金擴修廣泰圩延袤百餘里鄉人樂其利沒後至以馨香報之著有孝友家規訓家格言

王俊字述之少孤貧刻勵致豐厚性孝友喜善舉居鄉常苦水患廣泰圩捍其前俊乃修張家橋圩堤以禦其後地勢汗下爲費倍蓰澤鴻始安集焉子延慶楚師未入皖境豫遣人呈輿圖

具述險要爲嚮導兵得速進後二年延慶欲廣其父修隄之惠擬捐金倡築樅陽堤建閘以資蓄洩桐人訟於官百計撓之事遂寢至其子祁始倡築梅林堤事具溝洫篇

江坤字至元邑增生賦性誠篤敦行嗜學口不言貧爲文不徇時好雖屢躓於有司岸如也與人介直不阿儕輩以嚴見憚

丁黻字藻亭諸生工書法考充四庫館謄錄以遠違色養棄歸侍疾衣不解帶親歿服喪盡禮處兄弟友恭備至所得館穀悉無所私兄病篤禱以身代尋瘳三黨中婚喪葬埋貧不能舉者皆助之姑父歿於微跋涉冰雪歸其遺骸趙某客死解囊贖金以贖其妻女得扶喪歸他如施棺置義塚及家塾義莊以教族

中子孫諸善舉爲之必力年八十求書者踵門猶樂給之子樹梓亦以孝友稱

舒珍字筱坡生有至性少孤奉母教惟謹族黨以孝稱與友交直諒無欺勇於赴義歿之日邑中人無少長皆歎惜之衡陽彭玉麐曾受業於門後以兵部侍郎視舟師江上每過皖必遣廬請益執弟子禮甚恭珍於地方利病亦有所陳說語不及私師弟之情不以雲泥異也人兩高之

何容舟字樂如少有氣節安貧自適與朱琳相酬唱琳贈以詩云今人未有如君好古人未有如君貧性剛介不可干以私嘗作館城市與妓館爲鄰忽夜分妓踰牆至容舟所求匿云家方

有獄訟縣役將來捕故至此將有以報焉容舟曰官令奚可違厲聲拒之妓乃他適鄰舍有新娶者嘗見有女妖在室飾髻裹足時作挪揄態容舟至則避不見好方技嘗道遇病者診脈而藥之聞其歸程尚遠因助以旅資家中嘗蓄丸散數種以濟人急年三十有九自言以某期將死屬家人勿哭勿動其平時所用器物三日將復甦至期果死越二日身未冷顏色不變適親弟在外聞兄亡自途中號泣以歸據牀大哭家人盡哭哭畢視之乃知其不能甦矣

朱琳字玉林諸生性孝友事親盡愛竭誠親喪毀幾滅性忌日必齋終身無間事兩兄能讓產白首怡怡讀書洞見本原未嘗以能文自許真率淡定無所營求偶發爲詩歌皆朋儕投好娛情適性之作見之令人矜躁胥平鄉里有爭鬪及賭博者遙見琳至皆解散受業於門者先察其制行無虧然後與言文藝有貧甚者資以火食著有牧心齋詩草藝山堂制藝族兄藻翔字樸君才具恢闊文行與琳略相似著有樸君遺稿

孫選字萬青監生祖象武輕財好義鄉里稱善人從姪輩貧者多所分潤享年八十有八選六歲失怙事孀母以孝聞爲人忠厚簡默每歲終必周濟隣里救急難無吝色子孫五世同居百餘口共爨子延久性樸誠與人無爭鄰人有不能保其婚姻者捐金以全之延椿尤鍾愛於祖母黃暑月必躬爲驅蚊駿字延

祚武庠生性嗜詩書擯攝家政內外無間言無遠近皆稱爲義門云

李勳字紹胤監生好施與撫族中幼孤者二皆成立大父應檀嘗以田種十石與婿凌凌無嗣反授其半與勳不受凌歿經其喪葬其後凌氏以族子嗣鬻其產勳憐與金贈之性嗜古博覽羣書時爲詩歌嘯自適所交多知名士往還酬唱老而彌篤臬司某有齒宿才新之譽所著有竹圃詩草

陳友儒歲貢生姿性明敏慷慨激昂能任艱鉅咸豐三年省垣陷八月臬司張熙字以五百人駐集賢關友儒上防守策未及行而熙字戰敗賊焰愈熾友儒遂慟哭鬱憤以卒

張崧字禮端四兄早故撫遺孤如己出鄉舊有公局施棺助葬用艱費中止崧倡興之惠及泉壤

王治五字篤倫爲人有至性少孤每值家忌必哀號奠醊鄰里貧乏乞糴米豆區區之惠必浮所糴之數每屬曰勿令人知旣歿而人猶思念之

汪文然字燮坊歲荒有不能舉火者常密賙之其子嘗售芝麻七石於盱眙石壩集之互行其主以粟錢給價誤爲七十石文然覺令其子還之

胥崱麟字玉書諸生爲人質直厚重簡默孝友人無間言爲文不事雕飾教生徒必以禮法與朋友交雖書問不以時通而肫

摯之情久而彌篤

余信芳諸生性孝友親行矩步文翰不染俗塵從遊者數百計率翛然意遠想見遺風焉

曾鴻煜好義輕財有貸鴻煜金而浮其數以償於其子而不自知者鴻煜遣還之族人有爲祖塋爭訟連年者鴻煜費數十金調息之卒使兩造悔悟相讓有欲與聯宗者願捐鉅貲鴻煜以亂宗拒之

金鑿林道光癸未大水爲粥以待餓者或有以乞爲耻鑿林度其斷炊負米夜餽之有欲鬻子求活者鑿林周之乃止年七十餘臨終時呼其子舉族戚中所貸券悉焚之

張若迂性孝友重師儒精醫全活甚衆未嘗受謝家故貧以儉勤稍裕田宅皆與弟共之終身怡怡焉

郝邦成字厚培伯叔析居已十餘年邦成善治生家業不振復請合爨四世同居鄰里稱義其族有本域者字賓泉精醫不受謝金活人無數與堂弟姪析居有年復與同爨爲之經營其婚嫁本焱字耀堂諸生凡睦姻任卹興廢繼絕皆出貲任之道光癸未飢施粥以濟鄰里撫兄孤孫教養成立逾己孫焉其同里有陳同宣者與弟同修久析居弟家業零落同宣復分田給之於鄉里亦以平心率物輕財周急見稱有史乘者性正直教讀所得館穀悉分潤兄弟已無所私

葉聯字蓮彩樂善好施道光辛丑己酉間江湖大漲圩堤數潰
聯捐貲助築惠濟鄉里咸稱頌焉

汪燕字爲治性魯嗜學不羨紛華居父喪哀毀逾禮事母以孝
稱偶出或值大雨雪必歸視膳務得歡心而後卽安

葉兆奎字紫垣父大鵬撫標千總兆奎幼業儒術甘貧力學詞
章經義卓然可觀道光時撫標中軍張雲亭以武科殿元官安
慶頗嗜文墨於弁兵子弟極意栽植創立義學延兆奎教育之
盡心訓誨多所成就迄今猶有追念之者子廷杓軍功記名提
督贈兆奎振威將軍

何爾字羹梅祖熙乾隆辛卯副舉人世父沐霖見前傳爾幼習
制藝貧劇不能卒業因從歧黃家問道爲療貧計數年通其術
試之里巷有驗生平未嘗受餽遺初以醫爲試不願納人財物
有強以持贈者皆拒不受然招之輒往久且習以爲常里黨皆
知爾之廉也延醫者日不暇給率無所持贈於是貧乏不能自
存日一食以爲常卒未嘗與人言貧外人或知之歲時持贈有
所受輒如作負心事忸怩不安者數日或規之曰無以曲謹小
廉爲也曰吾術未至不足當一謝用是負負爾粵逆亂後流離
抑鬱而卒里人及今追念之

張國玉績學未遇生平不與外事孝友性成事季父尤恭謹季
父負官錢積年無從措繳縣役催拘甚迫國玉慨然以身任之

季父得免於繯纆

宗桂生力學未遇至性肫摯尤篤於友誼與武生朱占春爲總角交占春投營自効累擢千總集賢關之役占春與焉桂生日往省之見兵力甚薄不足當滔天之狂寇心竊隱憂及關陷占春陣亡桂生日夕涕泣尋其屍十餘日始辨獲之復周卹其家甫兩月桂生寢疾每言占春在其旁未幾遂卒人謂其生死相依也

王壽松字雪筠諸生家貧奮志詩書敦勵品節取與一無所苟族人有饒裕者甚倚重之多所助壽松遂以小康歲荒竭力以襄賑務居恒於所親皆分潤不少客所尊敬者歲時餽遺凡受益於其人每以圖報未稱時切欲然其至性純厚類如此

劉汝霖字潤生諸生讀書鄙章句屢躋棘闈卒未嘗刻意求爲時人科舉之文居平慷慨歎歎以撐拄綱常扶植名教爲己任家寒隨師宦遊甘涼學刑名之術非其所好輒棄去歸耕瘠田磨山下躬自扶犁鞭犢叱咤餽粥不充晏如也爲人魁梧奇偉健力善走返自甘肅挾其裝以行中途有悍夫數輩尾之連日不去汝霖知其爲胥篋來者忽車陷泥淖中前後車夫數人助昇車重不能起汝霖麾之去隻手拔引之行數武回顧劫者已却步不前矣咸豐壬子秋粵賊迫楚南汝霖始與其師友陳世鎔馬守愚江積中江湖輩倡團練議稟命大吏時藩司方徵錄

嘉道間詩人集提倡風雅扼不得行以安徽分野在斗時歲星臨之爲有福也癸丑正月十七日省城陷賊勢泛濫汝霖師友各匿深山中復謀團練應者夜行晝伏鄉人之迫受僞職者皆欲殺賊立功自效方將製器械旗幟部署什伍演習耳目手足之方又謀峙糧以俟官軍前進爲內應分道夾擊之事甫集時巡撫統兵駐廬州遣人通其意巡撫乃札委鄉人之巧宦者前來督辦道出賊卡爲所獲盡悉山中情狀與主辦姓名賊竟先發與謀者皆蒼黃逃遁賊中興大獄汝霖益愁窘跼蹙以行親上書臨淮帥袁甲三事不濟復赴廬乞師頓首泣血廬帥不出守愚復遣其子徵慶赴廬帥亦不行遂說巡撫門下士舉人李

元華帶所部入據潛山天堂環設關隘收儲蓄積以爲長守計訓練義勇以待乘機四出元華欣然會巡撫幕中有力阻者事竟寢汝霖遂抑鬱嘔血以死

汪積中字綱齋諸生父光弼字蘭軒一歲而孤少長刻勵如成人人事母能養其志處事精詳敦義氣重然諾喜周濟鄉里賴之積中敦厚樸誠讀書能識大義遇事直言無所顧忌省垣既陷與劉汝霖等倡團練謀儲峙以應官軍爲賊所覺事見前傳積中被執繫僞獄幾不測多方賂以金乃免及楚軍臨皖積中遂力籌薪米濟餉無遺誤督師嘉之保薦教職後署蒙城教諭六閱月卒於官族叔光泌歲貢生沈靜寡言潛心經籍於疑義多

所發明喪祭秉禮爲時所宗

馬文照字斗垣諸生成豐元年舉孝廉方正癸丑粵逆陷省垣禁薙髮文照欲起團練方薙髮入境猝與賊遇禍幾不測後劉汝霖江積中等事洩賊益逼置耳目文照計無所出竄伏菰蒲中連年長吟云蘆中高臥悲窮士江上長吟望美人丙辰秋秦鄭兩提督進軍桐城文照聞軍餉不繼赴桐勸捐輸以助所至皆諾七年春楊岳斌以提督率舟師駐黃石磯有機務每詣文照所咨詢甚相推重岳斌軍與洲民雜處安若井里文照居閒與有力焉病且死屬其子喪葬必如禮法家無擔石之儲官民相與助金治棺岳斌以聯輓之尤悼惜不置云

楊文楷字式齋歲貢生就職訓導與弟夢松互相研究宋五子書課徒悉有法度事母至孝母年過九旬兄弟每晨夕必問安否偶有小恙色卽不豫文楷慷慨好義道光末屢以賑務出力縣令贈一鄉善士匾額巡撫王植請六品銜以獎之

郝同燮字汝舟一字雲士弱不好弄七歲屬對卽工甫冠食廩餼巡撫鄧廷楨課試敬敷書院所特賞士十有八人一時有登瀛之目同燮與邑人葛高騫與焉然獨困塲屋同治丁卯始捷秋闈年已六十有五矣初同燮以歲貢生就教職歷署鳳陽含山廣德各學篆務所至以振興文教培養孤寒爲己任士林頌之同燮既澀於遇乃致力於學凡漢儒箋註宋儒性理皆熟玩

而身體之故其文非時俗膚淺所能而其持躬接物跬步皆有繩墨尤謹於言平生無一語道人短處既歿而宗族鄉黨猶思遺範焉

魯奕元字子淳號養菴諸生性質樸力學不倦敦倫紀操守堅定一介無所苟嘗謂人惟義利不明遂至墮行敗名故其行己訓俗尤於此斤斤焉自道光以來邑多水災經理賑務鄉人嘗舉奕元董其事先後無毫髮滲漏粵逆據省垣聞其爲物望所歸索之甚急遂挈眷匿江西浮梁山中流離瑣尾輒吟詠以自豪命曰丁己集同治改元鄉人欲以孝廉方正應選奕元辭焉曰盛名不易副也臨終自輓聯云生不算人只能守一貧字苟

延活命死原是鬼切莫聽二氏說超度忘魂孫巽以附生從軍累保至三品銜江蘇補用道泮林光緒辛卯經魁

汪暉吉字寅谷家貧奉母甘旨無缺值寇亂兩弟履吉丙吉遠從軍己身被創猶負母保持眷屬卒獲安全侍母病年餘不稍懈母歿喪葬如禮鄉里稱之

劉安來字樂齋居磨山麓兄弟四人皆貧窶無生計安來性至孝力作傭工所入竭力奉親終身不能娶養生送死皆獨任之必如禮處家人多委曲將順終無詬誶聲好學問聞鄉先生有品學者輒親就之先輩重其爲人樂與往還漸能讀書識大義作爲詩歌成帙求正於陳氏世鎔世鎔大奇之

諶宜勲字蘭坡少孤貧訓蒙自給事母服勞周至有愠色必婉言慰藉務悅親心母疾臥床褥百餘日晝夜省視不稍懈及歿哀毀骨立孺慕終身每忌日輒哀號奠醊鄉里感歎咸豐十年官軍圍賊益急賊踞城柴薪乏絕掘塚撲棺以爨宜勲聞掘其父墓急往尋之親族尼其行宜勲不從賊果疑爲間諜執之宜勲泣訴其情骸骨賴以獲全

汪若洋字觀瀾少孤貧事母竭力供甘旨母患目疾晨夕以舌舐之數日愈性嗜學治名法家言幕遊楚北母卒奔歸鄉里廬墓終喪後客吳中爲某令司會計見其用度無節私爲約省蓄至三千金某令未之知也遂病卒囊橐蕭然若洋乃出所蓄畀

其子爲經紀之由是義聲藉甚吳中大吏爭納聘羅致相倚如左右手咸豐癸丑粵逆陷金陵運道中梗若洋畫策海運至今稱便庚申蘇州不守大吏駐軍上海若洋爲籌守禦凡饜精武備咄嗟立辦以勞歷保同知加道銜同治壬申與妻劉氏同年八十合卺值周甲期戚黨繪圖徵詩一時傳爲盛事子福安官常熟時迎養在署每殘臘自袖金給孤苦者久之人始知爲邑尊父云

江鏜字震濟祖濬源父爾維俱有傳楷穎異博洽爲文清真刻露補邑增生幼失怙恃出嗣世父景紱事所後父暨庶母極孝庶母臥疾晝夜侍湯藥自是通歧黃家言然不肯輕試庶母父

相繼逝哀毀盡禮與諸從分遺產自取其瘠者伯姊李年三十而寡嘗遺之粟撫其甥世鸞讀書游庠有聲亂後家窘一介不取佐兄潮督滬餉釐潔已便民保鹽大使加運判銜未赴選卒著有聽彝堂文集以不欲暴於世自焚其稿

陳世遴字彙征性和易不苟言笑居恒恂恂長者而排難解紛片語立釋人以是欽之道光中洪水屢爲災倡捐重貲修堤以弭水患遇貧乏艱於婚嫁者每玉成之兩孫游庠貢成均人以爲積善所致云

以上同治志
馬徵慶分纂

丁啟運字盈字明季人侍父疾衣不解帶及喪哀毀骨立痛母之嫠也日夕問視依依如孺子督諸弟讀書身庀家政貲累巨

萬寶至無貴賤必與鈞禮父黨造門必躡履問起居故舊假貸未嘗以不足爲辭時流寇猖獗史中丞可法下令濬隍塹江爲固守計啟運慨然以破家承任中丞聞之檄至與籌畫機宜洞然中丞驚且喜曰皖城百萬生靈在子肩矣旣歸傾貲募壯士身親糾衆動工不數旬而竣中丞嘉其功特疏題請賜以省祭酒之官

李士度字配玉乾隆元年捐修淶水鄉遇緣橋有孟家嘴王大六者欠木客金將鬻妻爲汪氏妾士度聞哭聲代償之夫婦得完

王懷號玉山事繼母葛至孝淡於仕進嗜經史不習舉子業嘗

葇園亭蒔花草吟詠以自娛生平酷慕陶靖節著有步陶集一卷

姜鏊字昆賢國學生候選布政司理問饒於財喜施與道光間歲荒屢捐穀助賑閩督劉皖撫蔣那守張皆贈以獎額所云敦仁任卹爲善最樂風世勵俗洵不虛頌

潘如江道光三年邑大饑爲石鎮勸賑首董以父金遺資助賑邑侯朱贈以惠及桑梓匾額顏於潘氏家祠

陳春園世有隱德至春園更力行善事不怠以孝友聞鄉里有災患官吏重其操每敦請贊畫人不敢干以私年七十有二先期諭子孫無疾而終長子霞谷性高潔佐水師彭剛直幕數十

年以布衣終因勞瘁王事附祀湘軍昭忠祠三子采之董清節堂事有能聲

江光浩字延長廩生矢志讀書不與外事事母曲盡孝養嘗自食粗糲以旨甘奉母兄光治有惡疾侍湯藥三年未嘗稍懈既歿喪葬盡禮鄉人嘖嘖稱其孝友云

江佩湘字振立從九品性寬仁渾樸與人語訥訥然不能出口見大義輒慷慨損己勇爲之咸豐丙辰歲大荒里人孫某鬻婦圖自存急呼孫責之爲歸娶婦者錢俾夫婦如初後孫生數子竟不責其償生平喜吟詩每焚香煮茗嘯歌一室初不自知其艱窘也會弟潮提調滬釐一再遊滬上無所取惟携歸全唐詩

一部薰鑪茗杯數事而已

丁黻字章甫號藻亭曾建別業於句容又號容山牧叟好學能文補縣學生入都考充四庫館謄錄歸而徧游淮浙粵東久之始歸母與兄病劇嘗籲神求代父母歿執喪盡禮生平慷慨好義祖姑兩世遺醜在徽冒冰雪走千餘里扶歸族有嫠婦遺孤二助之田宅令婚娶得成立有友客死金陵妻女無所託贖金資之歸又族舊有義塾久廢議修復從子燮割田四十畝以倡黻出錢五萬佐之其他善舉率類此喜錄先儒格言時時與子孫縱論古人成敗以爲法戒閩俗喜溺女必多方勸止之晚年精書法既歸里構一角草堂以書自娛卒年八十次子蔚魁字

星儔號少牧亦以書名孫鴻文字子葵廩貢生不妄言笑事繼母蘇以孝聞家貧授徒自給暇則錄先賢格言盈箱篋著有三治志矜仕錄節烈傳又多忠勇平逆紀略二卷

江慶萊字振志一字雲門幼嗜學讀書喜深思薄遊豫章居臨江府幕中歲得束修百金悉以購書竟忘其家之貧也爲人伉直坦率似其兄奎與人無畛域而事涉名義爭之必力人與之語卽吐出肺肝平生不肯以詭詐疑人人有以詭詐欺之者初覺而悲移時輒忘處兄弟之間數十年無疾言遠色云

丁植模字樹之諸生性孝友閑家有法教人首以端品行慎交游尤謹身率先以爲模範其族衆萬數千人咸感其德化而鄉

俗爲一變至今孫曾逾百人仍守孝弟力田之舊其遺澤長也
丁樹梓號石揖諸生十歲隨伯父芬桂讀夜同榻伯年老天寒
冷被侵膚恒咳嗽不止樹梓每先趨伯枕寢伯至乃移就已枕
日以爲常母老患目疾有小不如意事輒負杖請責母笑遣之
乃去嘗教讀東冶塘節序回家路遇趙陳兩姓因墳屋構釁各
聚衆數百人持械相向樹梓赴兩方面跪拜請勿鬥事遂寢鄉
里以長者目之子名米文另有傳

金誠字舜臣號熬庵國學生以子官贈奉政大夫事親孝篤志
力學家貧授徒自給於人不苟取有與之者必報值凶年不再
餐不重綿見凍餒必多方爲衣食之凡置義山修古墓掩骼埋
胔等義舉爲之必力與人交極和易著有韻考四字略行世熬
庵文集散軼僅存蘭谿家鈔待梓

王塾號醉月父森林作宰甘肅昆仲五官遊者四塾次居三遵
父命歸理家政性穎悟喜古文尤長於詩著有醉月軒詩集爲
人不爲世俗累父致仕歸未半載歿越三月以哀毀過度亦卒
王光斗字省齋國學生性醇樸咸豐年間髮逆踞省僞官吏命
役追索錢糧鄰里不堪其擾君每爲力不足者代償俾免拘敲
之苦又里有某姓夜竊其稻約數升忽自驚曰此王先生田不
可竊乃傾於田隅詰旦夥覺具以告先斗喚誤竊者助以資令
貿易後漸至小康孫橋字星野事父母以孝聞其伯母矢志守

節橋事之如母

夏文洙字恒庵家故貧三歲失怙母氏倪和丸畫荻俾之成立及長爲請旌於朝建坊母墓旁姊曰惠馨適汪無子文洙迎其夫婦於家生養死葬一身任之遇不平事輒挺身出雖糜金錢弗恤也嘗因歲旱請大吏開潛邑吳塘堰前河之水灌注後河致懷潛七十餘坂得收穫倍他歲於族義舉及公益靡不爲捐義田立文課以培養族子弟又著寬忍慎勤四箴爲家法焉

丁濟字虛舟諸生寄居漢陽值漢水泛濫將及宅躬負大父出又以巨盆渡母暨弟妹轉棹屋傾沒母喪柩在堂鬱煙倏延墻屋回身投火中抱棺號哭眼流血氣息如縷火滅棺與宅無恙

人以爲孝感道光十五年奉旨旌表建坊郡侯賜匾額曰孝子

丁宗顯廩貢生生母卒弟田樹甫八歲繼母卒三弟燕樹亦幼均督之成立旋田樹入翰林燕樹入邑庠鄉里稱其教督之善燕樹天性純篤善詩文精書法母病刲股秘不令人知歲饑嘗贈銀阻人鬻妻

姜敏字南川年十三失怙恃弟南高甫七齡敏撫育成立家貧以捕魚爲業道光三年歲饑敏家毅然捐款助賑明年春又捐巨款以賑饑民

丁韞山字藻鑑太學生性純篤歲荒售穀置倍常升斗同宗有欲鬻媳者韞山畀以資得免又嘗過大龍山側有夫婦相持哭

甚哀詰知亦爲年饑故將鬻妻以養親傾囊與之俾完聚後數年復經其地其夫感謝辭曰吾無是事也其爲善不伐如此張遐祉號介繁先世家饒裕及身中落因棄舉子業服賈往來吳楚粵黔間以起其家咸豐間避亂深山遇鄉人被掠者輒往哀請每得免親戚中有喪不能舉者力任其難必爲營葬而後已亂前曾負漢上商人債近千金事平一一償訖人咸服其信義子昌熾號西山持躬勤儉常從父於深夜以布囊携錢往所悉不能舉火者或數十文或數百文分給不告姓名而去汪逢其字道源號滙堂諸生父鳳交以勤儉起家咸豐間歲旱里有謀退養媳者出資阻之並日煮粥以濟餓者逢其體素羸

讀書時偶得良方輒筆記鐫以行世性篤厚能承父志某乙匿情出婦收養於家有勸納爲筵室者逢其不可屬家人詢其故資遣之歸同治間獨力建家塾顏曰異馨堂月課族中子弟給膏獎有差子潤生性高尚不墜祖父風

舒雲章字鴻飛晚號斐成增生少孤依兄翹成立事兄如嚴父嗜讀書不干位外事同治初以謹飭自守鄉黨推重見知於太守陳濬後官鳳台廬江建德三學訓導所至一以樸素敦行教士學使祁世長尤重之歲考教官以喜見雲章第一篇詩句發題用示旌異姊適馬氏家貧咸豐季年雲章避地江西猶出重金俾其家全活弟雲錦號星橋廩生能文工書讀書一日十行

終身能記憶性友恭不慕聲色子愷號彝堂年十三喪母每日
晨必潛出哭諸墓歸強嬉笑爲堂上兩代解憂時避亂居鄉也
因得羸疾嗜經史并金石文字諸學早卒雲錦子殿文亦能文
工書曾冠童子軍

丁嶽生少穎悟以家貧親老先人多未葬乃習醫及青烏術咸
豐八年大兵猝至舉家昏夜星散嶽生獨負母出得無驚再從
伯曰健握台灣提學道篆嘗隨曰健入考棚有以金求售者嚴
却之

葛高新字楚然盱眙縣教諭醇篤孝友人無間言母病累月未
嘗安寢弟高炎諸生貧而力學工醫早卒僅遺腹一孤其姊適

勞氏者早寡高新於每夕課徒畢必一一往視雨雪無阻以所
入束修分贍之若孤姪體稍不適則爲之輟食悲歎蓋二十年
如一日生平授徒一本忠恕未嘗見其疾言遽色至今歿數十
年門生故舊猶稱歎其爲真人師云子振元自有傳

王志行號子誠附生性純篤事母至孝值咸豐癸丑之變母病
行動需人志行隨侍藥爐茶灶炊爨浣襦滌穢皆親執不肯去
爲匪擄輾轉至山西省累瀕於死終以間道歸同治元年里人
舉以應孝廉方正之徵與人接無論長官碩彥野老孺子一傾
以誠英翰撫皖時檄安徽省志任郵案懷寧前志節孝亦其手
編生平以表揚忠義節孝貞烈爲務當路重其品曾屬以清理

清節堂縣學宮諸事光緒二十四年重游泮水

王樾字保和以運漕行商致富好施與尤勇於公益嘉慶三年鄉里苦水患捐貲創修圩隄名曰廣泰後人蒙其樂利漸增廣之更名廣濟孫渭濱於圩工亦頗著勞勩

王鍾字緒端號靈川同治甲子舉人光緒元年選涇縣教諭性孝友惇品勵學曾入潘錫恩馬森甫幕從不干以私後進得其裁成至顯達者不勝枚舉逾七十猶吟詠不絕口著作甚富多殘缺

謝酬字普濟武生成豐十一年捐助曾文正大營錢四百千文爲修營竹木之用後隨營效力經李續賓多隆阿會保以把總儘先拔補歸田不仕又出私財建築洪鎮裴家坂謝家大圩成熟田種二百餘石人多稱之

陳孔毅字南齋國學生性純謹習申韓術不事深刻事嗣母王至孝母病劇常刲股和藥進尋愈得壽八十餘歲本生昆季有空乏周恤備至里人稱孝友焉

程子箴號半川廩貢生試用訓導麟德子同治初隨同一時著宿望者規復救生局於東門外旋局歸官辦日就隳廢光緒初大府仍以屬之性持重治事不稍遷就發一言籌一策必再三審慎而後行當道重之以故省城善舉公務如清節堂育嬰堂懷寧學宮鳳鳴書院保衛局皆屬清理董率之凡所肩承不避

勞怨三十年如一日嘗除夕稽考各處瑣務歸時已旭日曛曛矣光緒元年里人以應孝廉方正之徵牘上辭不就

胡兆祥字芝田幼失恃事繼母以孝聞服賈每自肆歸必定省值亂親負外家汪氏遺孤遠竄俾有後邑儒馬徵慶服其德經營伯叔父母喪葬皆盡禮中年喪偶不再娶生平喜與文學士游邑人王稷堂徐晴嵐浙人孔時可皆所敬事者光緒建元邑人舒卓元等爲舉孝廉方正辭不就

魯驥字小峯候補布政司經歷曾署四川秀洲巡檢父常見忠義傳咸豐四年蘇州城破驥前一日奉父命携幼弟鵬去驥不忍遠離越宿聞賊蹤過奔回省視則廬舍灰燼情急投水遇救

隨尋得父驥母姚妹雅媛從叔壽昌四屍面如生就近購隙地塋性友愛生平無疾言遽色戒殺生雖蚊蠅蚤蝨亦不忍傷害視宦途爲孽海蒞任未一月卽託故辭歸

張厚載端重寡言笑事繼母陳鄭兩孀人能得歡心弟及姊妹友愛無間長姊適何家中落子女五人俱依載養贍甥得以成立乾隆丙午曾拾遺金數十金訪其人歸之董體仁局所設施棺木藥餌濟人之事不辭勞瘁五年之間計葬枯骨三百五十餘塚人稱盛德焉嘉慶元年朱石君中丞給以居賢善俗匾額道光改元應孝廉方正選得六品頂戴當時榮之子文鳳文磨補博士弟子員孫瀛邑庠生

馬澤受字咸甫號味韶諸生性誠篤精堪輿學常客渾春都統署以功保知縣加同知銜留吉林補用不就日與所契覽長白山水之雄或著爲歌詩或發爲長嘯都統恩澤嘗詰不入仕途之故曰才不足恐貽誤蒼生也都統深佩誦之後偶疾其長子延初往返萬餘里迎歸時年甫十七頤養十餘年卒於家

劉良木號道林古樸寡言家小康凡親知有急走相告必應遇鄉鄰之爭者得良木一言立解子乙書號守拙性淡榮利喜吟詩善書法士林稱之嘗拾遺金仍以還諸失者

楊柱廷字君荷諸生桐城富豪某謀買其族祖墓旁地暮夜袖百金以請柱廷峻辭絕之某慙沮去嘗召集鄉人嚴賭約勒碑垂禁立變其風

汪淦字觀橋號鑄侯諸生性質直與人不稍假辭色粵兵踞皖中時郡縣士夫多充僞職有以淦名應者輒執義叱之時禁民間喪葬不得如故事淦母歿族人勸勿牽於禮數淦泣然曰不能盡人子一日之心可乎卒殯葬如古禮

汪元燁字序賓號嘒夫諸生時中子元燁積學好禮不苟言笑與人交恭敬惟謹爲文勦去時習兼通歧黃術試輒驗晚年好吟咏著有菊莊詩草

方壯猷字午橋登道光庚子賢書居京師掉鞅詞壇與諸作者爭雄長立身孤介不得志於時浮沈郎署垂二十年亂後再入

京師頽然自放髮垂垂白境益窘而胸次益超所著作甚富以西夷換約之變全稿遺失其族姪孫炳奎手錄詠物詩若干首分爲二卷刊之題爲海鶴亭詠物存稿後復刻其自壬子迄辛酉詩二卷名曰江天秋雨吟皆避亂後作也

徐旭字晴嵐廩貢生性誠篤家貧課徒自給門弟子起科甲者甚衆精藻鑑每就文論決其人生平研術數於易占尤精驗文清剛雋上工古近體詩有遺藁藏於家光緒建元邑人公舉孝廉方正堅辭不就子澹字熙齋光緒戊辰舉人官青陽縣教諭教士一以誠多所成就

胡椿字雲門傑字竹薌兄弟也父兆祥以救其戚諸鳳舞於賊中百計贖歸鬱憤成癩兄弟更番侍養一日傑以事偶間父外出傑號呼走尋數十里迎歸病旋愈兩人遂承父賈業以勞苦起其家居喪三年不御內不聞樂不飲酒亂既定椿日坐肆察交易家事一委之於傑然兩人必商而後行雖耄老不變傑素剛教姪如子偶犯必痛繩之而椿夫婦以爲於禮宜也門內肅雍無敢肆者生平欽師重交游樂施與兩人如一人而椿渾和天成鄉黨稱爲長者初里中創設清節堂由傑經紀得成立後郡尊以堂董難其人敦請再四乃出公正持大體與其共事楊鏡潭誼和尤契合焉嗜學喜讀性理書工詩善醫顧名爲書掩四體皆工惟時以漢隸應求者偶爲石鼓鐘鼎文尤饒古趣室

置書籍名帖甚富自顏所居曰古歡草堂椿則喜種花每晨光
熹微傑起而坐讀椿冒風露躬自灌溉不以爲苦邑儒馬徵慶
盛稱其澹遠有逸致謂生意古意盎然一室其父好德克有是
二子云

李亦田和易近人每遇族黨紛難必爲之排解慷慨樂施與董
永清局四十餘年光緒蝗災捕之不遺餘力八年潛太患蛟工
賑尤爲出力

趙古善號心田諸生洪楊之變曾忠襄督師來攻時聞其名令
鄉導及辦糧草事竣論功給五品頂戴後修縣學宮曾董其役
生平坦白無私爲鄉人欽敬尤安貧守分雖至親密友亦無所
干謁壽七十二卒里人至今稱之

程之棟號琴軒有幹濟才同治初大亂甫平於籌軍餉辦底征
修學宮建書院創清節堂及懷寧節孝祠均著有勞勩湖廣總
督官文以轉運功奏獎從九選用經理學宮事尤久與人接無
少長咸服其謙和常與其兄之幹捐貲建茶亭以憇路人
江文彥世力田而言談風采不類田家子性亢直於族人有不
可者諄諄教誡如己子家貧鬻蔬自活城市人喜其無欺樂與
之交易至沿街小兒有江翁之呼生平喜施與積辛劬所獲輒
以給孤苦者晚年經理萬安局遇有暴飢雖風雨寒暑必奔走
在視歛瘞之不自知其爲七十歲人也督子嚴邑人劉訓煌有

文名敬禮倍至令其子兩時師事之兩時曾就幕天長縣署歸而授徒胡氏古歡草堂束修較微屢欲他徙文彥持不可謂吾兒得良師友勝得金多矣兩時字澍亭既從訓煌讀入邑庠補增生歷主辦育正尙志兩等小學於弟子愛之甚而督之嚴有時或不能受然卒未嘗不悔悟旋充陸軍小學國文教員師範校管理員名聲益起自營所居曰橫山老圃示不忘舊也值國變支持危局官建平縣以丁父艱去任復充師範校庶務兼文牘已而還舊任歸充女師範校校長在官愛民如子積勞得咯血症歸逾年而卒年四十有八爲人外喜圓而性故方雖其所敬事或不當無顧忌必形於辭色喜讀宋儒書習靜坐法又好

爲詩聲響激越既臥牀蓐猶吟詩自遣病革時作二書戒其妻子跌坐而逝門弟子聞之無不驚惜爲開會追悼之

楊發第號兆蓉廩貢生生際洪楊之變讀書山口鎮之城隍廟亂至則避山谷中去復還讀膏火斷繼以月性端謹笑言不苟無疾聲厲色以課徒自給坐必正襟行必入矩酷暑未見其一袒楊與人交淡而永同里陳同書觀察官高麗清電報局時招往授讀年餘卒同里邵國霖時充今大總統出使隨員爲歸其櫬士林欽其範每惜其遇云

查輔廷廩貢生素重道義教授子弟一以謹言慎行爲歸性正直鄉鄰有競爭者經輔廷爲決是非無不和解

查懋慶字子餘廩生性純篤訥於言幼失怙恃兄嫂撫之厚懋慶事兄嫂一如父母年十一值亂被擄越四歲遁歸喜讀周易一以俟命固窮自勵戚友有苟求富貴者絕不與往還棘闈無力赴或助金趣之行拒不受曰予無聞達志久矣以課徒終其身

蔣飛鸞字履雲邑庠生英遺腹子幼穎異承母訓克繼父志以道義爲根本非應試不履城市授徒文行並重成就者多子序恭字傅巖邑增生嗜學不倦生平不妄交人孫玉堂字牧垣邑庠生工書法性嚴正同治初董理征賦有侵蝕者時江督曾國藩駐節省垣軍令森嚴無敢犯玉堂獨控懇得更其人都人士

咸利賴之

蔣得輅字壽樓國學生性孝友弟有一女臨歿遺言嫁此女時以某產作奩資屆期或勸阻德輅泣然曰口血未乾而背之將何以見亡弟於地下邪竟與之咸豐間歲饑爲購運穀米貸飢者里人多賴以存活弟德輪國學生亦樂施與嚴冬時常解衣衣人里中有失職業者爲給錢與之營生以起其家尤好放生戒殺

蔣森字敬之邑庠生廉直篤孝友繼母弟以其不善理生產求析居森不與較有族某病卒其戚利其子幼謀變其產而陰吞之顧憚森欲先餌之森勃然曰介人之危以爲己利可乎事遂

寢子友朋武庠生狷介不苟有父風焉

汪鑑芳幼家貧年三十始經商稍得蓄積卽周恤貧人不吝粵兵入境擄鄰子三人芳出巨資設法贖回不索償族中有鬪絕而棺暴者買山葬之子樹勳廩貢生敦品勵學有聲於時何國本字耐溪事母孝好施與民國元年爲族人倡辦惇叙小學又於洋徐保倡辦迪志小學二年三橋洋徐兩保患水爲墊欸赴省購辦平糶飢民得慶更生清光緒間朝天宮闢官壩向受洪水冲塌國本督修之五閱月告竣所修復欲圮議重築而仍自督工以疾卒事聞大總統給以嘉惠梓桑額

黃星號毓文嘗過香口遇婦哭而哀詢之乃鬻子度日星爲追及彭澤給錢歸之性伉直族黨有構釁者輒來就質星每具樽酒調停各悅服而去後舉爲鄉飲大賓

郝同益號地山邑諸生性樸質寡言笑鄉居授徒短褐不完晏如也長子棄儒就賈獲厚貲同益布衣蔬食一如寒素時遇人有急難解囊伙助不少吝五服中有貧不能喪葬者益竭力營辦不責償里有同仁局爲施棺木掩枯骸之用同益首捐巨欸以爲之倡

郝同馭字硯溪號篤山性古樸寡言笑終日端坐雖盛暑不袒貢就教職同治壬申司霍山鐸有富家子某年終押學故事贈學官金帛始得釋同馭廉得其家有老母立釋歸酬以金峻詞

拒之光緒丁亥署虹鄉學事未期月卽卸篆適學使按臨例分修金一半同馭委之後任不少惜州守方聞而嘆曰郝君眞長者也堂弟同箴在郎署與游多措紳巨族卒未一投刺苜蓿一盤處之廓如也著有駕山館文集一卷宦游雜詠二卷方書集成一卷

楊開榜號詠齋增生嘗授徒於貴池夜有鄰婦奔就拒弗納遂託故辭館歸後其事爲僮洩人詢之開榜終不言

劉維新國學生父早逝以母多病棄儒習醫母得以無恙後疾革力弱不能吐痰維新以口承而吮之又躬爲湔滌穢汚生平不苟言笑善書法嗜因果書尤樂爲放生及施藥掩骼等事

童蒙恩字綸閣附貢生家貧不苟取嘗授徒自塾歸所得修金爲車夫失去無怨言且慰藉之生平謹言笑不諧流俗喜爲詩稿多散佚

郝同道字桂蘭太學生恬淡寡欲精岐黃術遨遊鳳壽間活人無算性孝友母病篤親嘗糞割股和藥以進兄弟析產以長兄楨及姪聰皆積學早世悉以田產畀姪媳撫孤同道妻家太邑張姓饒於財時樅陽大水人相食同道貸張姓穀四百八十石運縱貸之饑民不責值有故人子貧不能自存攜至家飲食教誨且爲營婚娶後某竟以名顯

吳馨號顏山恩貢生博學多識著有禹貢水道爾雅輯註藏於

家居常好施與不苟言笑道光初鄰邑望江西圩潰飢民嗷嗷
馨見之急白郡守郡爲捐廉馨亦首倡捐得鉅款圩民賴以全
活弟容號遂谷歲貢生嘉慶間董修聖廟六旬後雙目失明尙
能課授生徒講解無誤焉

葉逢辰號榮卿邑庠生成豐未曾忠襄克皖城有蜚語中其兄
者逢辰爲兄受繫居營月餘忠襄察其誣釋歸族有嫠輒收恤
其母子或助金全其節嘗爲里人汪先貴經紀父喪其家欲嫁
其母償所負逢辰聞力阻之不責其償

汪天齊性純篤歲飢常變產振濟囊旣空乃舌耕度日與其婦
茹蔬啜粥無怨言

汪蓮田號義谷副貢生父鳴歧已有傳蓮田內行純篤言動無
妄粵軍踞皖邑有附之者造蜚語中人蓮田父子與焉衆咸思
遜蓮田持不可曰與其貽累鄉鄰不如挺身就繫倘得代父死
又奚辭比至以誠告父得釋而蓮田留苦楚備至官軍至始脫
歸父腦後患癰膿血凝閉朝夕以口吮之道光庚戌冬白石牌
解館歸路遇店婦哭甚哀詢知爲夫病子幼故將改嫁慨然以
二十金子之俾其完聚同治丁卯以保案教授潁州嗣授南陵
教諭一介不苟年老終於官仲弟龍驤邑庠生父訓導安東祖
母以道遠不願就養龍驤留侍能曲盡歡心家被火龍驤獨向
烈焰中負祖母出餘無所惜粵軍嘗強使受職堅辭之官軍至

幫辦籌餉將軍都興阿累擬特保不受因以教職保其兄蓮田
季弟晉號竹賢廩膳生爲文有奇氣持身以儉四旬失偶有勸
再娶者不應

陳華崇字正揆居柘澗山其先世多隱君子父希千故積德於
鄉里華崇恪守其教食貧養志以孝友聞咸豐初粵匪踞安慶
挈兩弟渡江流離轉徙十數年間患難扶持不失家庭聚處之
樂世平歸里每歲時伏臘羔酒言歡怡怡然如童時之親愛人
咸敬而慕之性冲澹希逸不慕榮利日必薄醉遨遊山水間以
適性怡情生平無疾聲厲色卽里中桀黠者遇之亦服其雅量
無敢以非禮干者尤好施與族戚貧乏之必視其力周恤之未嘗

有德色所居山莊義塚孤墳暴露歲加培護無缺子際唐宰丹
陽元和縣時常勗以勤廉愛民甘旨所奉輒節其貲以拯鄉里
窮困及孤寡無告者易簣之日戒母厚塋囑以節蓄二千金爲
濟賑之備光緒三十二年院北鳳穎泗各屬大饑其子際唐出
所遺金助賑巡撫恩銘聞於朝給予樂善好施匾額

吳懋官號美含濬之兄也幼習舉子業年甫冠遭父喪瑣瑣家
正不肯累諸母率弟讀書而自理焉每以遠大勗弟曰成吾志
者當在汝也及弟通顯懋官不改常度慕義好仁尤過於平昔
何維楨字鵝湖附貢生幼失恃侍父讀事繼母曲盡孝養父患
癱以口吮之居喪一遵古禮兄死於賊冒刃求得尸以土瘞之

撫兄子如己子光緒某歲大水節食以給飢者又嘗嚴冬督築所居附近堤二十里冒雨雪冰結衣纍纍不爲苦里中舊患無畝之征曾國藩撫皖察其實蠲除之後大吏仍攤分吏役維楨上書爭之大吏怒其抗欲置之法爭益力役卒得免

蔡恩湛廩貢生幼穎異早孤事母孝母偶怒則跪膝前必俟怒解始敢起侍疾親嘗湯藥衣不解帶夜不就枕疾愈乃已侍人謙恭而親處兄弟間則極友愛生平喜爲詩文識卓越輩流著有幽風七月篇詩行世

汪錦華字省吾國學生性寬厚每以直道解人之紛有查氏寄租二百石於其宅值亂被劫事平不舉劫者姓名解囊償之

郝啓筠號雲章鄉飲大賓性嚴正不可干以私在安慶府署辦公時有昏夜賄託者正色拒之尤敦孝友家庭之內閭閻如也詹勤潮字益元父喜善舉亂後家中落勤潮服賈甚勤事無鉅細皆躬親之行篤性剛每春秋祭日必手香楮哭奠先塋督子學尤嚴族子弟敬憚至有過舉不敢使勤潮知

胡濟生號心源歲貢生性耿介人不敢干以私教授生徒至老不倦

查禹導國學生氣和性直曾董理學宮士重其品遇鄉里紛爭輒正言決其曲直蓋排難解紛振困濟貧爲其素志云

黃時茂字乾裕性慈善初居江浦小甸時出外貿易遇叟負薪

失足於澗喊救之僉曰此某村孤人也時茂憐甚買藥敷其創給錢雇送其家而去及老歸故鄉親族無嗣枯骨俱載回購山埋藏而碑誌之凡他遺骸得資助而葬者亦多嘗與族兄時興倡議捐穀豫儲境內三元會以濟難民

汪鳳壘字子垣增生性孝友居鄉戒爭訟學行爲邑人所欽奔父喪中途夏漲星夜涉水忘其險阻

胥遵芳號子春邑庠生性孝友生平言笑不苟遇水災典質賑濟合族賴以舉火故當時有胥善人之稱

路顯道號佑之性純厚爲文不肯諧流俗閉門習靜專以孝經儀禮等篇課子侄族中貧窮乏嗣者助資娶室至於待鄰里鄉

郇尤以慈善聞

沈壽甲字梓楨剛正不阿與弟壽山並有賢聲淡於仕進入邑庠後惟刻苦力學年近期頤猶不釋卷云

劉濟川字才江早失怙恃事庶母能執子禮值亂族某舉家死難於建德僅遺一髻齡子負重病濟川收恤若己子卒爲之完婚起其家

陳有纓字正冠性厚而孝鄰里有飢寒者輒周濟不望報值亂父以年老不能行賊至劫財物有纓以身障父受重創死

查昕廩貢生性端慤教授生徒有法族衆萬人敬而憚之罕有犯不韙者查海山有族人孤無依海山收養之生子成立資遣

歸又有丐者江某病調以飲食數日而斃爲具衣棺殮焉
黃士正字吉甫儒士事後母至孝咸豐時官軍謀復皖城以倡
籌餉械功保州判銜委司養濟院事爲里黨解紛難人服其平
晚年舉鄉飲大賓

楊名立字漢夫附貢生倜儻有大志成豐間邑地丁魚鱗冊盡
失官設局廣村清釐之名立實董其成後建六邑考棚文廟大
成殿鳳鳴書院皆費省工堅名立有力焉院口官豸橋名立先
人所捐建也歷時既久漁戶或橫施罟杙致損橋址名立爲請
於官嚴禁護之橋得永峙

楊誼楨字競爽廩貢生性和而介不可干以私道光中海禁開
鴉片流毒甚劇隣右多有染其癖者誼楨每切戒氣爲之轉移
弟誼遠字羽儀其家析爨時相與爭取薄田不求自利族某妻
爲勢者奪誼遠費巨金爭回俾仍爲夫婦事竣不責償此外出
資完人嫁娶者屢見

程世德字克齋少讀書不治生產性誠樸好爲慈善事成豐六
年歲大饑斗米千錢世德罄其資雇傭間道走河南運米歸以
濟貧者某佃積租三年屢遣人索之怒曰不予可自來明日某
佃至曰無以卒歲奈何世德顏爲之霽曰有是哉免其租焚其
券其後家道中落尤孳孳不倦故婦孺皆呼之曰程善人

孫蘭號右亭恩貢生學有根柢道義自娛口故訥而獨善講解

弟子數百人多所成就兄謀有幹濟才弟宗培精醫術一門之內雍雍如也

孫枝號竹堂貢生祖諸生朝勳父儒士秉南俱以善人著枝生有至性五歲失怙號慟如成人九歲奇瘡生頤頰間內外腐潰數之得十有一孔歷年餘羣醫束手忽一異丐來吮之骨脫而愈當瘡劇時母在前慮母滋戚必強爲言笑其實固痛楚萬狀也比長承顏順志一本至誠非有故未嘗一日違左右母病偕妻張迭侍床側進湯藥惟謹母歿奉主朝夕必親自獻食偶他出則令張代終三年無間長姊早寡迎歸養垂五十年親鄰求助必應不能償則召焚其券嘗兩值歲饑量力推食光緒八年

蛟水復賤糶濟貧次子縉字迪庵力學砥行試輒冠其曹邑令吳雲濤亟賞之終不遇

楊懷清號松泉候選州同事嗣母方以孝聞生值亂離以貿易起家尊師重友輕財好義族人惇饒獨寡者均周恤備至子繼忠見仕業

楊誼和字鏡潭候選布經歷性梗介幼遭喪亂棄舉業研經世之學於兵家言堪輿術尤有心得曾經理安省清節堂米鹽瑣屑一一必親視教諸孤兒矜其遇嚴其規一時內外肅然十三年如一日卸堂事後居城市杜門不出天高氣爽每徒步作看山行或日數里或日數十里人咸以安丘上人目之

汪鎮第字禮崇舉人性篤誠敦古道父兄皆諸生早卒家貧艱苦刻勵課徒養母幼聘劉某女愚鈍不能理笄櫛比長劉某令改娶不可卒迎歸生二子皆秀特云

黃鏡清號澹如附貢生隱居授徒嚴而有法里有石橋一屬通衢久圯獨輸資以爲衆倡重修之嘗因避亂路拾遺女撫之及笄爲擇良配又率族人儲公費以豐祀事銖積寸累勞瘁不辭享年八十有二

楊嵩號麟山諸生有文名族中文會課推嵩掌教一時族人多欽服生平守正不阿遇非禮事輒面斥之而尤惡鴉片之害光緒庚寅稟請邑侯范保廉出示嚴禁捐錢勒石自是鄉里有此

嗜好者咸敬憚之子高杞諸生有父風

操和字倫清太學生性平易近人尤重然諾好施予里有爭競聞和言立解

何厚亭字光旭號玉甯性厚重與其婦劉慷慨好施與鄰里鄉邨有貧乏者輒解囊濟之無吝色子銓植字景朝號慶華有文名屢試屢躓欲以祿養輸粟得官然意終弗屑遣興琴樽寄情花木未嘗與世競得失焉孫星照見道藝

舒化文字問農邑庠生以長子鴻貽贈通奉大夫爲人身長疏皙而有容好善嫉惡持之甚嚴辨取予甚力不取虛美不逐世好獨行己志年四十喪妻不復娶勸之則曰吾不願爲兒女累

也兩薦於鄉不獲售遂絕意進取課子姪輩一以嚴門內讀書
聲常夜分不息堂弟殿文早逝子五人長子七歲幼子尙在遺
腹化文曰吾弟不幸以歿諸子未成立是我責也嚴督一如己
子以故子姪輩讀書致用均通達政治有聲譽化文行二與兄
肇文均幼孤生母黃太夫人以節義旌於朝肇文字芻圃官靈
璧涇縣兩學教諭亦篤行君子也

何忠材字藝圃優廩生弱冠值亂避居深山讀書授徒供甘旨
既平以辦省北城團防功保訓導旋出而迭佐戎幕由雲南馬
提軍保五品銜直隸李總督復保加五品頂戴三署穎上合肥
兩縣學篆去而士子懸額講堂矜式後來者居恒治家極嚴謂

婦子嘻嘻失家節故寧守家人九三之占然與人交則一接以
和易罷官後猶授徒課子爲樂既歿其弟子阮忠樞忠植雖顯
貴猶稱感師德不忘云

操明倫字徵庸監生侍父疾奉湯藥不稍懈者十餘年操懋性
字茂春好善舉操英字效曾咸豐六年大旱盡出家積貸鄉鄰
操錡字晏清諸生一介不苟取有好事者故以金錢賂錡曰吾
不敢謂學楊震却暮夜金竊慕其爲人何以是誘我耶皆一時
之良也

朱昆字甫田性端謹一言一動必式於禮喜讀性理書工書法
事親孝著有督孫編四卷皆言性理也

楊鸞號幹之性情豪邁親族中有貧無室者輒解囊以助謀娶有貸資不能償者則出其券焚之咸豐六年大早捐穀濟人多所全活弟金聲號振之附貢生廉明公正遇事直言

徐中岳母病割股肉寸許和藥以進疾仍不瘳乃書疏焚香跪庭中籲天泣禱願以身代無何母疾愈而中岳竟以創死矣秦祥鳳張致祥均年二十九喪婦有子不復娶以義夫旌

夏昌芷字古畹嘗經商小市港鎮距家三里每歸日視母雖風雨寒暑無間兄早卒事嫂盡禮撫遺姪二如己子既成立析產多與之未幾姪又先後卒撫其三姪孫俾姪婦得安其居生平以勤儉起家自奉甚薄於鄉鄰故舊貧不能自存者時賙恤之

嚴宗德字春義國學生值咸豐之亂不應賊試賊怒遷及其父將加刑翼趨出請代賊義之父子皆得釋

楊禮賓字藩屏國學生從曾國荃軍嘗冒險赴江西購米以濟軍食得獎五品銜事平閉門養望好施與歲荒出困粟貸衆不計值友愛昆弟室無間言事庶母王尤以孝稱

王俊字述之四川理番廳鄧祖也道光辛卯癸巳出粟賑飢嘗施湯藥給樁木置義山局田續修廣太圩又勦修張家橋子延慶字古愚繼志以竣厥功孫祚字杏村咸豐之亂冒險救父至受重創同治辛未全弟鄴督築後圩統名廣濟周亘百里又建鳳鳴書院

彭爵修字福來性至孝母稽病幾不起割股和藥以進病遂愈
蘇瑞麟字春林性純樸處宗黨間能用晦而明咸豐之亂從曾
國荃軍中以精幹勤慎歷保至知縣弟懷清字筱泉善爲里人
解紛難

柯濤字文波諸生事寡母至孝丁亂遇賊每負母伏草莽有
食先獻母已餒弗顧事兄尤謹子元桐附貢生出繼弟照元桐
性純摯以鹽知事官兩淮聞照病棄差省視徒步冒風露入深
山求醫得愈

楊植杏號紫垣議叙縣丞父漢風早歿母病常割股以療後母
歿停柩中堂寢苦枕塊閱三年餘歿於喪次

羅永泰性直而廉恥不爲善光緒八年蛟水肆虐永泰經理興
仁局務倡募鉅資撈取浮尸漂棺三百餘具又於潛太各處招
領後仍存六十餘具請縣令譚廷獻給示逐一檢視買山安葬
葬畢復倡修局志以垂不朽云同里孫祖培孫恩培與永泰素
相善均以好義聞於時

何光宗字敦本性純篤以母青年守節立志顯揚光緒初有王
劉氏夫貧曾借光宗錢係夫兄出據夫歿家益貧賣身以償光
宗聞立焚券全其節其他陰德多稱是

濮文藻字泮林國學生慈善性成嘗同諸弟捐基屋創萬安局
行諸義舉年七十五預知臨終日期屆時戚族畢至就庭中端

坐逝弟傳霖字盈科生平耿直好義舉凡萬安局惜字掩埋施棺送藥冬賑放生諸舉終身力行不怠

周輝烈字祖武號海門安徽撫標左營候補外委秉性剛正自任監理救生局驗收浮屍掩瘞事宜不避寒暑風雨必親往督視不以惡臭爲苦不領薪膳且往往解囊犒工捐布紙資裹殮十餘年如一日知府劉傳祺局委徐本璿皆甚重之旌以樂善不倦額

張德全字葆之幼孤事母孝家貧常自忍飢而以甘旨奉母母詰之則詭詞以慰喜善舉贊勳各善局而於永安局尤盡力性耿介不苟取一文

鮑家健字凌雲幼孤善事母從父母有貧無嗣者變產爲營窰窰析產以沃田讓從弟雲亭躬耕之暇輒流覽諸稗史及形家言教子讀書以敬師稱性渾厚而取予必嚴貴池某甲因兵亂僦家健屋以居兵復至倉皇遠避適鮑村火起延及家健屋亟令人移出某甲什物而封識之比某甲歸一一付給之某甲感其高義沒齒不忘

楊靜泉號向善父玉生以商業起家靜泉性孝不忍老父膺家累棄書經理朝夕督僮僕治生產以勤儉聞遇有困難者求輒應值洪楊據皖四鄉設局需索煩重人不堪其擾靜泉獨任局務墊鉅款鄉里賴以安咸豐丙辰大飢捐米平糶活人無算至

今父老猶稱道弗衰焉年八十無疾卒弟體仁國學生有幹濟才

楊發程號雲輒諸生少能詩持躬謹篤同治初修學宮建書院諸大端多所贊助與人交時以詩爲酬答及馬徵慶等續修縣志擔採訪任悉心考查不遺餘力尤好古書購盈篋晚年構月華齋一楹爲吟誦地

李代任性慈祥嘗自徽境探譜稿携欸歸路遇一婦抱子臨水哭詢之婦曰夫死無以爲殯吾母子又奚能自存將求死耳代任傾囊濟之抵家自籌欸償譜費焉

江以祈父懷仁咸豐初粵兵索銀鞭箠極苦以祈哀號貸死兵

易其縛繫數月形神俱憊卒免於死

孫澤民輕財重義兄弟析居遺產盡歸伯季嘗給金完族人不能婚者性亢直有不可必面斥之人亦無怨言

胡燮號坦白父國治績學未遇樂善好施燮性不屑治生兄弟析箸悉以田讓弟而已無所得除夕無米爲炊室人交謫燮處之豁如也父爲粵兵所虜燮尾其後大呼請代兵怒繫之幾不測燮某聞而義之尋釋歸

胡乙號燦照青廩貢生性魯鈍讀書終夜不就寢人笑其拙乙笑曰吾以拙補勤也晚歲造詣益深每有撰述輒自焚其稿故世鮮有傳者

胡光輔字永年幼失怙家貧以農爲業母積不如意卽跪母前請罪必母命起而後起母卒哀毀骨立三年不飲酒食肉不入內室遇生忌辰輒哭泣不食人以爲孝行可嘉云

胡一純字潤生國學生性純篤好善舉高河埠廣濟橋每至夏秋水漲數溺人爲倡捐鑄鐵柱欄其橋行者稱便又土街火殃及十餘家陰袖金畀之不告姓名而去

曹勳字惠風邑庠生有至性侍父病衣不解帶試湯藥嘗痰味及父母相繼歿不入內室者六年

張廷獻性篤厚家不及中人產而輕財重義弟錫純號壽堂廩貢生刻苦自勵授徒鄉里館穀所入歲必分潤弟昆年七十餘

猶樂育不倦胞姪光熙郡廩生文名藉甚光容光暹諸生皆爲其所成就以故一時有義門張氏之稱焉

蔣在文字芸生邑庠生狷介不苟父煩早卒奉母曲盡孝養母病割臂療之愈後母年八十疾復作將焚香母呼曰自古皆有死余年至此亦已足矣何爲爾爾既居喪一依古禮族弟序亮故婦龍遺腹纒數月其父母欲奪而嫁之婦不可母以聞卽遣隨母同居生子後七年另爨仍月給米以供其母子

姜慶成字子醇父延嗣謹厚慶成少沈靜爲院掾一介不苟取嘗夏無帷幕蒙被槁臥以筆管支鼻通呼吸息雖歲時值僚友嬉遊歸必兀坐以待會父疾日理案牘畢輒趨視湯藥每旦出暮

歸里夜出不交睫中丞姚同得其情益重之適姚內川約與俱以親老不欲往父再四促之始去臨行戒弟善事親且勿廢學供事京師以勞授河南魯山縣典史尋調南陽林水驛丞兼巡檢事所在有聲子儻既服官乃辭職歸就養泮庭置花木以吟詩作書自娛

姜正懋字士勉事母王以孝稱與妻張撫兄子若己出終身相依戒其子勿各爨家貧爲郡刑曹掾性好靜晚愛白雲巷深處有城市鄉村之致乃置小齋積書滿左右時與友人縱酒賦詩數斗不醉嘗於郡西社壇嶺拾遺金尋其人還之

潘用光性樸質不苟言笑好施與尤重然諾同治歲飢有向用光稱貸者擬鬻養媳備償用光聞焚其券里人賢之

王櫻號古顛府學生員幼端謹年十七父塾以哀毀卒以母老絕意進取家居授徒供甘旨母歿哀毀逾常有里某與族人爭地欲丐櫻一言敝其家屢不舉火袖金進櫻正色曰爾以吾窮可貨耶郤之卒據理寢其事三子乃枚號蔚存廩貢生試用訓導續學有文行父歿諸弟幼穉皆爲教養成立

郝忠貴字在朝寄籍潛山生平修齋供佛日以檢拾字紙爲業性至孝母歿廬墓三年潛令孔某聞而異之與邑紳親詣墓所勸慰再四迎之歸舍

楊方仲邑庠生性孝友侍母病三年不離寢席居喪哀毀如禮

事諸兄如父有甘旨必獻不求宦達惟以耕讀課子孫嘗曰孝弟力田吾世世用之不竭也

蔣青雲字翰章少讀書長而服賈事親至孝父病侍藥嘗廢寢食咸豐初以督辦民團功例得獎堅辭不受生平待人忠恕而律己甚嚴遇善舉則捐輸恐後每歲除輒親携米券銀幣以給窮老無告者云

查懋桐字琴齋明敏清介族黨有疑難得懋桐片言立釋道光末歲饑辦賑同事者不敢干以私知縣宋培深敬服之世亂居舊橋東岸以八分書及詩賦自娛閒則課孫授徒必以根柢六經變化氣質爲本家無擔石裕如也以歲貢候選訓導補五合

縣教諭未赴任卒

程懷質字春浦性慈厚其族貧不能自存者多爲撫養婚葬不遺餘力

魯世喆字少卿優附生父奕元另有傳性孝友年近五旬父責之恒怡然敬受家貧以舌耕自給諸兄有貧乏出俸金分潤之姪孫輩能讀書者必自教之并代籌食用性亢直不避權勢子泮林光緒辛卯科鄉試經魁亦以能文名

金詔字鳳銜增生光緒元年孝廉方正旋授南陵縣訓導性孝友家貧勇於赴義訓士以敦品力學爲宗

章郁文號小園與兄煥文篤友愛兄聘路氏早歿畢生守義以

弟子爲嗣郁文究心掌故諸書中年喪妻亦不再娶母病六載晝夜侍奉母稍懈爲清節堂董事事必躬親孀婦咸沾其惠蔡青號茂林國學生屏居授徒不求聞達隻字不入公門喜善舉於里中隄費仗助甚力有孤苦者輒施衣米而不名

韋輔臣字茂林世業賈少丁洪楊變家業蕩然因負販往來兵間博升斗供菽水遇窮阨者節食遺之皖城復邑人議建太平局振濟貧乏輔臣繼其叔遠揚董局事先後與江寧祝大榮桐城汪有德會請皖撫陳彝歲給倉粟千石振飢民身任其艱按戶給付或有牽裾強索者勢洶洶亦絕不與校官粟不足則倡捐應之一歲所入均常耗其半數十年如一日每冬臘間查貧

乏戶率四五十日無或間至今身受其惠與熱心慈善事業者時追念三人不置云

李盛熙賦性端謹不苟言笑幼失怙哀毀異常母病親侍湯藥衣不解帶者數月母歿結廬墓側日夜號泣爲暑濕所侵病卒墓次

王煥達業農事親孝人無間言光緒庚寅夏五月高河埠王家壩水陡漲有行人陷於水呼救煥達父長齡毅然獨往水湧甚未及援長齡亦溺幾斃煥達聞急奔救甫挽父手詎洪水猝發煥達竟殉父而死

潘思齊字懿美樂施與咸豐九年經兵燹出貲斂埋枯骨於同

德堂義山復募捐爲常年祀費十一年臘杪大雪飢民麇集下石鎮各族祠凍餓瀕死思齊爲逐日施粥俟雪融冰消乃止光緒初又捐貲建築中街石橋行人至今稱頌之

吳俊字馨山家貧厲學雖日不餐不懈年十八授徒於鄉藉束脩供父母父母有疾嘗所飲藥復泣禱於神求代兄弟均產以兩兄業農子女衆自請不均等以故貧獨甚授徒之暇復躬耕隴晦以餘力助其兄性肫摯重然諾居恒嗜飲飲輒大醉然不少失檢遇人无少長必恭謹其行誼之敦如此

黃鴻友號涓岩少隨父徙江浦貿易母乳生疽嘗以口吮癰穢刺乳血拌藥搽洗之終弗救翌年扶櫬歸舟泊丁家洲遇流尸

撈起購棺以瘞晚居故里不事華飾戚族中貧無喪葬婚嫁資者輒輸助而完成之

張慶餘事繼母孝嘗襄辦體仁局育嬰堂一文會諸善舉一時稱慈善家年三十餘喪偶以有子終身不復娶曾散數千金產濟人急每歲終令子率价擔米炭錢暗送貧乏者

曹蓮峯邑庠生家素貧課徒爲業窮年矻矻不染塵俗所謂讀書自愛者也曹一莊邑庠生事親孝教子有法族衆千數百人凡有紛爭必就質焉一言立解無不心服

方光華字復前每屆年終憫鄉里有貧乏者發倉周濟毫無難色尙志學校成立嘗捐助多金歿後子蔭棠復獨力建七里亭

西之賓鴻橋行人稱之

王祖偉號雪漁舉人揀選知縣性穎異早失怙事母孝誦讀之暇必殷然問母安否嘗以唐句誰言寸草心報得三春暉十字疊韻作五絕百首名烏養齋詩存後在京聞母歿徒步奔喪三千里跋涉之苦不知也服闋復北上授職有期遘疾卒

王培字仙根邑諸生迂謹好學父母早卒事祖母至孝粵寇踞金陵借闡浙江祖母命培就試游錢塘詩有云西山日暮慈顏遠東道風微客棹孤人爭誦之尤善古文工書法著有綱目便覽字學辨訛諸書姪樹號植人郡庠生爲人冲淡閑雅從不道人短著有小學補註待梓

查鳴歧邑庠生天性慈仁鄉人稱長者曾遇貧家鬻子爲給錢數十緡贖還之

黃華殿初居江浦嘗購棺木貯於湯泉鎮東嶽廟以收尸骸之無歸者嘗語子鳳台曰懷寧吾故鄉祖墓在焉當歸奉禮祀後華殿患滯下鳳台晝夜事之不畏污穢旣終鳳台扶櫬歸葬貧乏者周濟之人咸稱其善繼父志云

劉善鳴少讀書性魯顧恥居人下刻苦好學卒以文名素誠樸鄉里以善人目之

陳澍滋字熊飛號西軒附貢生少好讀書究心經史寡言笑友教四方門下多知名之士

馬振武號仲甫生平無疾言遽色兩弟緇武宗武皆貴顯振武獨侍母家居不通一刺於當事鄉里有貧乏困難者酌濟之院撫裕祿重其行上其名於朝不就

查榮儒國學生正直不欺尤孝友弟既析居歿後撫幼姪如己子以節儉起家買田數十石仍分給焉

孫光輝篤孝友戒子孫以勤儉無私財無聽婦言七世同居男女百六十人祥和之氣洋溢門庭

王嘉會性和易與人未嘗見詞色舉動恂謹一依禮法

甯敬尊字懋齋恩貢生黜華崇實見重士林一時出其門下者多列膠庠甯文燦字松軒事親孝謹好善樂施凡鄰里戚族中

有窘乏者必傾囊助之遇慈善公益事亦復竭力提倡

郝邦晟字添秀太學生少讀書屢躋場屋遂棄儒就賈設藥鋪於皖城遇貧無力者不責值復在維揚開玉器店獲利倍屣先是同堂兄弟十人已析產邦晟輦貲歸廣置田園與諸昆弟合爨已而析居照房數派分一無所私其他購義庄設試館施棺木修橋梁諸善舉不可枚舉以孫同儻貴贈中憲大夫

戴翠峯性最孝咸豐十一年避亂母氏桂日警翠峯負至沙河嘴無渡匪追及遂涉水渡河挈妻子不及均溺死匪去覓得骸骨埋葬

何粹儒字香巖性慈善歲飢值隆冬大雪鄰有不舉火者按戶

給米道光十二三年大水帑賑告匱粹儒家故貧勉力倡捐全活無數

劉履字德成性恭謹事父母極孝清咸同間民病瘟疫枯骨遍野履捐貲瘞埋

劉時普宅心寬厚憫李家河行人病涉捐貲建橋往來利之

何光玉字蘧伯道光癸未甲午皖省疊遭水災歷辦工賑並監築下新河口堤壩以資防禦

鄭錫齡家貧與弟分爨友愛敦篤嘗寓休寧課徒十餘年歸而置田若干仍與弟均分之喜與弟子談性理與鄉民談因果以故人多薰其德且喜放生爲耗費甚巨云

吳鍾號秀夫邑庠生性醇謹終其身未嘗言人過而薄俗非法之行不敢以相干吳鉞性孝友出入無間言治歧黃術專以濟人絲毫無所取鄰里紛爭必爲排解甚至捐囊以息之吳涵郡庠生勵士行善楷書窮經數十年每欲有所撰述輒嘆曰古人已先我而言矣何贅爲用財不計出入歲冬積雪里中無炊煙者望而資送之其周急類如此

胡文琳號雨岩家貧業農兄弟三人極友愛年七十始析產戚族中因文琳長而賢擬先提白金數百畀之文琳堅辭不受強之文琳曰吾二弟食指繁卽以金付二弟時論賢之咸豐丙辰歲大旱斗米千錢文琳捐穀數百石賑饑民不足則稱貸以補

之活人甚衆年八十五端坐而逝

胡永定郡庠生言笑不苟終其身公門無一字之入胡偉號丹山邑庠生光緒間公舉經理學宮襄建書院並採訪節孝凡有爭訟無不排解以故鄉人陰受其賜者甚多

甘棠號芾軒恩貢生性渾厚生平不以不肖待人年七旬非地方利病之大擯弗知聞日惟以耕讀課孫曾輩優游鄉里年八十有二無疾終臨終之夕神氣湛然自示其期亦一異也

何國珍字佩賢咸豐洪楊之變以軍功獲曾國藩獎六品藍翎旋委署荊州遊擊因母病辭職歸躬耕養母弟耐溪讀書得日疾親製藥療之閱七寒暑不倦

丁庚先字吉卿廩生能文一時從學衆性廉介不與世合嘗於抱龍河全弟魏甲倡捐建臥龍橋以濟行路

楊棟華字知球號棠齋國學生以兵燹廢舉子業好施與鄉里子女年已壯未娶及笄未嫁多仗助以完其家室其幼無依死無歸者矜全尤至

宣煦字璞存增生年三十喪偶其年母病患痢晝夜十數次更衣無力動轉上下牀榻皆煦隨時負掖親捐糞灌垢察便色以與醫者定方劑三月如一日母病以愈光緒初與堂弟勳同應歲試勳出場卽歸越日案發已與勳俱列前茅明日當復試煦慮勳自家至城相距六十里恐無及徒步至家召之至已憊不

能入場是年勦食餼曰弟得之不猶愈於己乎生平爲文能鎔鑄經史闡發至道門弟子多宗之

宣保庸字香岑少承家學務爲詩古文不利文場躑躅童試者十餘年後之京師試北闈屢薦不售有再從弟佑冠者保庸伯祖之孫也先年晰產佑受田五斗保庸父慮其不濟時謂保庸曰汝當善視之後保庸續置田產乃與佑及姪三分之佑所得者逾前四倍保庸老年貧病交加亦不之惜嘗館桐城潘青照家嗣後青照服官天津承修總行署保庸司收支木商持銀券三千與之保庸輒然揮之出其清介多類是

朱大武字允謨篤志力學四旬後郡試兩取冠軍守擬拔首而微嫌其垂暮終覆時有自內出密以關說相探者大武不答自茲不復入試場家號素封析居時以田產多者讓之兄而已則寡取之後豐齋判然晏如也

朱代春號笑如太學生事後母至孝母性嚴小不懌輒笞之又愛彌甚見代春或以課讀笞子則必笞代春而代春惟怡色順受無敢違父遭怨家屈抑負狀復仇備歷艱苦父寃終以大白性慎重恂恂寡言不輕與他人事家不甚饒何氏清氏兩外家均貧數爲之謀婚娶營窀穸其他善舉悉量力而行蓋見義勇爲天性然也

高貽潛字傲園好善樂施於萬安局醫藥掩埋諸事力行不倦

王鵬字流芳號讓溪貢生性仁厚好施與乞貸無吝容而耿直之氣不可干以私清光緒八年水災重傾困米煮粥救饑嗣襄賑務勞瘁備至長官嘉焉又購穀種以給貧不能耕者弗責值鄉人有忿爭得其言排解卽平人以是多敬愛之

丁米文字子繪號質庵十二能屬文書得歐陽詢筆意同治甲子由廩膳生得選拔并舉於鄉洎揀發奉天知縣以母老不肯就七試春闈房薦者五丁丑擬元榜發竟落第一時名公卿如合肥李鴻章劉銘傳同邑葉伯英暨皖撫英翰輩均慕其才米文不事干謁故所學不見用於時而礪節砥行德器深粹鄉人士以此益賢之

陳衍中字象五生有異姿束髮受書岸然柴立值亂既定家徒壁立母勞氏不忍其子廢學墜世業爲擇師授讀夜歸侍母紡織燈下誦聲徹戶外無間寒暑旣入邑庠舉優行有文名甯國孫太守招之授徒以母病不肯往母趣之曰家無長物戀我非孝也比至甯國而母已卒聞信奔喪痛哭血下自是承母意諄諄以訓季弟衍庶爲務衍庶卒以是舉於鄉性仁厚於親友困乏解衣推食無吝色從學者旣衆弟子貧不能供束脩者輒飯食而教誨之生平慷慨有大志屢困場屋乃納粟以府經歷需次江蘇會染疫疾卒於懷寧會館年三十有四長子健生邑庠生有文名以同知官瀋陽亦年三十餘而卒

何恩謨字承家貢生慷慨好施其稱貸於人有貧不能償者檢

券焚之

胡遠濬孫緒
郝秀觀分纂

